

四庫全書

子部

欽定四庫全書

子部

玉海卷一百四十二

詳校官中書

臣

張經田

主事

臣

祁韻士覆勘

總校官進士

臣

朱

鈴

校對官編修

臣

朱

攸

謄錄監生

臣

魏綿

曾

欽定四庫全書

玉海卷一百四十二

宋 王應麟 撰

兵制

陣法

顏師古曰戰陳之義本因陳列為音而音變耳字則作陳更無別體而宋代學者輒改其字旁從車非經史之本文也

黃帝陣法

通典黃帝制陣法 唐獨孤及八陣圖記云黃帝受命之始順殺氣以作兵法文昌以命將握機制勝作為陣圖夫八宮之位正則數不憊神不忒故八其陣所以定位也衡抗於外軸布於內風雲附其四維所以備物也虎張翼以進蛇向敵而蟠飛龍翔鳥上下其執以致用也至若疑兵以固其餘地游車以按其後列門具將發升後令戰弛張則二

廣失舉掎角則四奇皆出天寶中有為韜鈴者得其遺制於黃帝書之外篇裂素而圖之

黃帝丘井法

李靖問對黃帝始立丘井之法因以制兵故井分四道八家處之其形井字間方九馬五為陣法四為間地此所謂數起於五也虛其中大將居之環其四面諸部連繞此所謂終於八也及乎變化制勝紛紛紜紜鬪亂而法不亂渾渾沌沌形圓而勢不散所謂散而成八復而

為一也太宗曰善乎黃帝之制兵也後世雖有天智神
畧莫能窺其間闕矣

黃帝四軍

孫子闕

風后握機文 握奇圖

李靖問對黃帝兵法世傳握奇文嚴從依風后大旨為
圖以擬方陳 書目風后握機圖經一卷薛氏詮定云
握奇經別有續圖記金革旗麾進退趨鬪之法

風后八陣圖

漢藝文志陰陽家風后十三篇圖二卷黃帝臣依托之
五行家風后孤虛二十卷書目風后握奇圖經一卷
風后握奇八陣圖一卷獨孤及風后八陣圖記云得
其遺制於黃帝書之外篇裂素而圖之

周武王三陳

原闕

武王鈎陳壘

水經注河南有鈎陳壘世傳武王伐紂八百諸侯所會

處尚書所謂不期同時也紫微有鈎陳之宿主兵陣故
遁甲攻取之法以取攻神與勾陳并氣下制所臨之辰
是以壘次見其名

太公畫地法 周四衝陣

通典昔武王將伐紂問太公曰若令敵人圍我斷我後
糧吾欲徐以為陣以敗為勝奈何太公曰不可此天下
困兵也暴用之則勝徐用之則敗可為四衝陣以驍騎
驚其君親左軍疾右軍迭前迭後往敵之空吾軍疾擊

鼓呼而當

鄭魚麗陳

左傳桓五年王以諸侯伐鄭鄭伯禦之曼伯為右拒祭仲為左拒原繁高渠彌以中軍奉公為魚麗之陳先偏後伍伍承彌縫注司馬法車戰二十五乘為偏以車居前以伍次之承偏之際而彌縫闕漏也五人為伍此蓋魚麗陳法東京賦驚鶴魚麗箕張翼舒

楚陳法

左傳莊公四年楚武王荆尸授師焉注尸陳也更為
楚陳兵之法楚於此參用戟為陳宣十二年楚子圍
鄭晉師救鄭隨武子曰荆尸而舉軍行右轅左追蓐前
茅慮無中權後勁百官象物而動軍政不戒而備注荆
楚也尸陳也楚武王始更為此陳法遂以為名在車右
者挾轅為戰備在左者追求草蓐為宿備慮無如今軍
行前有斥候蹋伏皆持以絳及白為幡見騎賊舉絳幡
見步賊舉白幡備慮有無也茅明也或曰時楚以茅為

旌識 楚子使求成于晉晉人許之楚許伯御樂伯攝
叔為右以致晉師許伯曰吾聞致師者御靡旌摩壘而
還樂伯曰吾聞致師者左射以敢代御執轡御下兩馬
掉鞅而還攝叔曰吾聞致師者右入壘折馘執俘而還
皆行其所聞而復云云王之入晉軍也遂出陳孫叔曰進
之寧我薄人無人薄我詩云元戎十乘以先啓行先人
也先去聲軍志曰先人有奪人之心薄之也遂疾進師車
馳卒奔乘晉軍桓子不知所為鼓於軍中曰先濟者有

賞中軍下軍爭舟舟中之指可掬也晉師右移上軍未
動工尹齊將右拒卒以逐下軍楚子使唐狡與蔡鳩居
告唐惠侯使潘黨率游闕四十乘從唐侯以為左拒以
從上軍

游闕游車
補闕者

左傳桓九年楚使鬬廉帥師及

巴師圍鄢鄧救鄢鬬廉衡陳其師於巴師之中
以戰而北鄧人逐之背巴師而夾攻之鄧師大
敗

晉五陳

左傳昭元年晉中行穆子敗無終及羣狄于太原將戰
魏舒曰彼徒我車所遇又阨以什共車必克困諸阨又
克請皆卒自我始乃毀車以為行五乘為三伍為五陳
以相離兩於前伍於後專為右角參為左角偏為前拒
以誘之未陳而薄之大敗之 襄三年晉侯之弟揚干亂
行於曲梁注行陳次 襄十八年齊侯登巫山以望晉師
晉人使司馬斤山澤之險雖所不至必旆而疏陳之使乘
車者左實右偽以旆先與曳柴而從之齊侯見之畏其衆也

吳方陳

吳語吳王昏乃戒令秣馬食士夜中乃令服兵擐甲

係馬舌出火竈陳士卒百人以為徹行百行

徹通也以百人

通為一行百行為

行頭皆官師擁鐸拱稽

擁抱也稽榮戟也

萬人謂之方陳

建肥胡奉文犀之渠

肥胡幡也

十行一嬖大夫

十行千人嬖下也

建旗提鼓挾經秉枹

挾兵書秉枹鼓

十旌一將軍

十軍萬人將軍命卿

載常建鼓挾經秉枹萬人以為方陳皆白常白旂素

甲白羽之矰望之如荼王親秉鉞載白旗以中陳而立

左軍亦如之皆赤常赤旗丹甲朱羽之矜望之如火右
軍亦如之皆玄常玄旗黑甲烏羽之矜望之如墨為帶
甲三萬以勢攻雞鳴乃定既陳去晉軍一里昧明王乃
秉枹親就鳴鐘鼓丁寧鐸于振鐸勇怯盡應三軍皆譁
鉦以振旅其聲動天地晉師大駭 左傳哀十七年越
子為左右勾卒注鉤伍相著別為左右屯 左傳昭二
十一年救宋與華氏戰于赭丘鄭翩願為鵠其御願為
鵠注鄭翩華氏黨鵠鵠皆陳名 哀二十五年衛侯為

支離之卒注陳名

周振旅陳

夏官大司馬中春教振旅司馬以旗致民平列陳如戰

之陳

注凡師出曰治兵入曰振旅疏爾雅云出為治兵尚威武也入為振旅反尊卑也言反尊卑者出則壯

者在前老弱在後入則壯者在後老弱在前

辨鼓鐸鐃鈙之用王執路鼓諸

侯執賁鼓軍將執晉鼓師帥執提旅帥執鼙卒長執鈙

兩司馬執鐸公司馬執鐃

司馬法云十人之長執鉦百人之師執鐸千人之師執鼙

萬人之主執大鼓

以教坐作進退疾徐疏數之節遂以蒐田有

司表貉誓民鼓遂圍禁火弊獻禽以祭社中夏教芟舍

如振旅之陳羣吏撰車徒讀書契辨號名之用帥以門

名縣鄙各以其名家以號名鄉以州名野以邑名百官

各象其事以辨軍之夜事其他皆如振旅

芟讀如萊沛之沛芟舍草

止之也軍有草止之法

遂以苗田如蒐之法車弊獻禽以享礿中

秋教治兵如振旅之陳

春以入兵為名尚農事秋以出兵為名秋嚴尚威故也云如振

旅之陳者如春振旅時坐作進退疾徐疏數之法也

辨旗物之用王載太常諸侯

載旂軍吏載旗師都載旛鄉遂載物郊野載旒百官載

旗各書其事與其號馬其他皆如振旅遂以獮田如蒐田之法羅弊致禽以祀祊中冬教大閱前期羣吏戒衆庶修戰法虞人萊所田之野為表百步則一為三表又五十步為一表田之日司馬建旗于後表之中羣吏以旗物鼓鐸錫鑄各帥其民而致質明弊旗誅後至者乃陳車徒如戰之陳皆坐

注萊芟除可陳之處後表之中五十步表之中央表所以識正

行列也四表積二百五十步左右之廣當容三軍疏後表之中五十步表之中央者謂從南表至北表云表所以識正行列者於可陳之中央立此四表表兩相各有三軍之衆至表則間一而坐坐而更起是表正行列也

云積二百五十步者以三表之間有二百步又加一表五十步合之為二百五十步也云左右之廣當容三軍者據天子六軍整數而言其實兼羨卒之等

羣吏聽誓于陳前斬牲以左右

徇陳曰不用命者斬之

羣吏諸軍帥也

中軍以鼙令鼓鼓人皆

三鼓司馬振鐸羣吏作旗車徒皆作鼓行鳴鐸車徒皆

行及表乃止三鼓撓鐸羣吏弊旗車徒皆坐

中軍中軍之將也天

子六軍三三而居一偏羣吏既聽誓各復其部曲中軍之將令鼓鼓以作其士衆之氣也鼓人者中軍之將帥旅帥也司馬兩司馬也振鐸以作衆作起也既起鼓人擊鼓以行之伍長鳴鐸以節之伍長一曰公司馬及表自後表前至第二表也三鼓者鼓人也撓者止行息氣也司馬法曰鼓聲不過閭鼙聲不過閭鐸聲不過琅

又三鼓振鐸作旗車徒皆作鼓進鳴鐃車驟徒趨及表乃止坐作如初乃鼓車馳徒走及表乃止鼓戒三闕車三發徒三刺乃鼓退鳴鐃且卻及表乃止坐作如初遂以狩田以旌為左右和之門羣吏各帥其車徒以叙和出左右陳車徒有司平之旗居卒間以分地前後有屯百步有司巡其前後險野人為主易野車為主

軍門曰和

今謂之壘門立兩旌以為之叙和出用次第出和門也

既陳乃設驅逆之車有司

表貉于陳前中軍以鼙令鼓鼓人皆三鼓羣司馬振鐸

車徒皆作遂鼓行徒銜枚而進大獸公之小禽私之獲者取左耳及所弊鼓皆駢車徒皆譟徒乃弊致禽饁獸于郊入獻禽以享烝及師大合軍以行禁令以救無辜伐有罪若大師則掌其戒令涖大卜帥執事涖釁主及軍器及致建太常比軍衆誅後至者及戰巡陳眡事而賞罰若師有功則左執律右秉鉞以先愷樂獻于社若師不功則厭而奉主車

厭於涉反謂厭冠喪服也

曲禮前有水則

載青旌前有塵埃則載鳴鳶前有車騎則載飛鴻前有

士師則載虎皮前有摯獸則載貔貅疏王行宜警衛善
惡必先知之故備設軍陳行止之法也

司馬穰苴陣

通典司馬穰苴曰五人為伍十伍為隊一軍凡二百五
十隊餘奇為握奇故一軍以三千七百五十人為奇兵
隊七十有五以為中壘守地六千尺積尺得四里以中
壘四面乘之一面得地三百步壘內有地三頃餘百八
十步正門為握奇大將軍居之六纛五麾金鼓府藏輜

積皆中壘外餘八千七百五十人隊百七十五分為八

陣六陣各有千九十四人六陣各減一人以為一陣之

部署舉一軍則千軍可知

凡兵者有四正四奇或合而為一或離而為八是曰八陣

故曰以正合以奇勝也

一說凡立軍一人曰獨二人曰比三人曰

參比參曰伍伍人為列

列有頭

二列為火

十人有長立火子

五火

為隊

五十人有頭

二隊為官

百人立長

二官為曲

二百人立候

二曲為

部

四百人立司馬

二部為校

八百人立尉

二校為裨

千六百人立將軍

二裨

為軍

三千二百人有將軍副將軍也

孫子八陣 孫子陣法

禮車僕注孫子八陣有革車之陣 隋志孫子八陣圖

一卷吳孫子北八變圖二卷三十二壘經一卷 文選

攄八陣之列注孫吳兵法 史記孫子武者齊人也為

吳王小試勒兵乃出宮中美人百八十人分為二隊以

寵姬二人各為隊長皆令持戰令之曰前則視心左視

左手右視右手後即視背約東既布乃設鈇鉞即三令

五申之於是鼓之右鼓之左 武經總要今之祕府所

存孫子書惟十三篇無圖其所言皆權謀之事極為精密戰國如二孫吳起輩號為用兵者而著書皆有圖漢名臣如韓信子房刪定亦著其法周公亦典司馬教坐作進退之度蓋陣法者所以訓齊士衆使其上下如一起前後左右進退周旋如身之運臂臂之使指無不如意李筌太白陰經云秦由余有陣圖

黃石公五壘圖

隋志黃石公五壘圖一卷

漢上林習戰陳

匈奴傳贊文帝中年赫然發憤遂躬戎服親御鞍馬從
六郡良家材力之士馳射上林講習戰陳 西都賦盛
娛遊之壯觀奮大武於上囿因以威戎夸狄曜威靈講
武事

漢兵形勢圖

藝文志兵形執十一家圖十八卷楚兵法圖四卷孫軫
圖二卷王孫圖五卷魏公子圖十卷

漢西域陣法

陳湯傳郅支單于自以大國威名尊重又乘勝驕困辱漢使者建昭三年湯與甘延壽出西域湯矯制發城郭諸國兵車師戊巳校尉屯田吏士部勒行陳益置揚威白虎合騎之校註張晏曰西域陳法之名也 漢兵胡

兵合四萬餘人即日引軍分行別為六校前至郅支城都賴水上離城三里止營傳陳望見單于城上立五采幡織數百人被甲乘城百餘騎往來馳城下步兵百餘

人為魚鱗陳湯進薄城下四面圍城發薪燒木城吏士大呼乘之

漢背水陳

史記韓信擊趙未至井陘口三十里止舍夜半傳發選輕騎二千人人持一赤幟從間道躡山而望趙軍誠曰趙見我走必空壁逐我若疾入趙壁拔趙幟立漢赤幟信乃使萬人先行出背水陳平旦信建大將之旗鼓鼓行出井陘口趙開壁擊之信佯走水上軍趙果空壁爭

漢旗鼓水上軍皆殊死戰信所出奇兵二千騎共候趙空壁逐利則馳入趙壁皆拔趙旗立漢赤幟二千趙軍已不勝欲還歸壁壁皆漢赤幟而大驚以為漢皆已得趙王將矣兵遂亂遁走於是漢兵夾擊大破趙軍諸將問信曰兵法右倍山陵前左水澤今將軍反背水陳竟以勝此何術也信曰兵法不曰陷之死地而後生置之亡地而後存且信非素拊循士大夫也此所謂驅市人而戰之其勢非置之死地使人人自為戰寧可得而用

之

高祖與諸侯兵共擊楚軍與項羽決勝垓下淮陰侯將三十萬自當之孔將軍居左費將軍居右皇帝在後絳侯柴將軍在皇帝後項羽之卒可十萬淮陰侯先合不利却孔將軍費將軍縱兵不利淮陰侯復乘之大敗垓

下

呂氏曰此陣即馬隆所謂魯公不識者也

李廣與人居則畫地為軍陳

陳湯傳步兵百餘人夾門為魚鱗陳

漢六十四陣

禮儀志立秋之日迎氣禮畢始揚威武斬牲於郊東門以薦陵廟其儀乘輿御戎路白馬朱鬣執弩射牲牲以鹿麋太宰令謁者各一人載獲車馳駟送陵廟還宮遣使齎束帛以賜武官武官隸兵習戰陳之儀斬牲之禮名曰驅劉兵官皆肄孫吳兵法六十四陣名曰乘之注月令盧植注如漢家乘之引鬪蹋鞠屬魏書漢承秦制三時不講唯十月都試車駕幸長安水南門

會五營士為八陣進退名曰乘之 周禮注射
人祭祀則賛射牲國語曰禘郊之事天子必自
射其牲今立秋有軀劉云 靈帝時大將軍司
馬涼假司馬伍宏說大將軍何進曰太公六韜
有天子將兵事可以威厭四方 蓋勲曰寇在
遠而設近陣不足以昭果毅祇黷武耳

漢竇憲伐匈奴八陣

本傳憲拜車騎將軍大破單于遂登燕然山刻石勒功

銘曰勒以八陣洎以威神注兵法有八陣圖 文選注
八陣一曰方陣二曰圓陣三曰牝陣四曰牡陣五曰衝
陣六曰輪陣七曰浮沮陣八曰鴈行陣

漢諸葛亮八陣圖

本傳亮推演兵法作八陣圖咸得其要

建興元年亮舉
東南征為教曰

用兵之道攻城為下心戰為上兵戰為下亮至南中生
致孟獲使觀於營陣之間縱使更戰七縱七擒獲曰公
天威也南人不復反矣 司馬

懿案行營壘曰天下奇才也

郡縣志八陣圖在夔州

奉節縣西七里 寰宇記夔州奉節縣本漢魚復縣八

陣圖在縣西南七里荊州圖副云永安宮南一里渚下
平磧上周回四百一十八丈中有諸葛武侯八陣圖聚
細石為之各高五尺廣十圍歷然碁布縱橫相當中間
相去九尺正中開北巷巷悉廣五尺凡六十四聚或為
散亂及為夏水所沒冬水退復依然如故盛弘之荊州
記云魚復縣西聚細石為壘方可數百步壘西聚石為
八行行聚八聚二間相去二丈因曰八陣既成自今行師
更不覆敗八陣及壘皆圖兵勢行藏之權自後深識者

所不能了桓溫伐蜀經之以爲常山蛇勢此蓋意言之
水經江水又東逕諸葛亮圖壘南注沔陽定軍山東
谷高平是亮宿營處營東即八陣圖也遺基略在崩褫
難識 九域志夔州八陣磧自然而成在江水之中

中興書目武侯八陣圖一卷後人推演其法模爲圖今

蜀中魚復平沙上壘八石爲行相去二丈凡六十四莖

世傳亮所製也

蘇氏曰自山上俯視百餘丈凡八行六十四莖上圖不見凸凹處如日中益

影耳就視皆卵石漫漫不可辨

薛氏曰圖之可見者三在沔陽之高平

舊壘

郡縣志在興元府西縣東南十里武侯壘石門為圖

一在新都之八陣鄉

郡縣

志在成都府西縣北十九里寰宇記在縣北三十里牟彌鎮李膺益州記云椎子關北五里武侯八陣圖土城

四門中起六十四魁八八為行魁方一丈高三尺

一在魚復永安宮南江灘水

上洞當中黃龍騰鳥飛折衝虎翼握機衝陣之法本諸葛武侯方圓北壯衝方置車輪雁行之制 蔡氏

曰八陣有二一在魚復石磧迄今如故一在廣都土壘

今已殘破不可考世傳風后握機文則魚復圖之注馬

隆八陣贊又握機文之注成都圖經云八陣凡三在夔

者六十有四方陣法也在彌牟者一百二十有八當頭

陣法也在碁盤市者二百五十有六下營法也

南市一名碁盤

市武侯陣營基

興元志西縣亦有之則八陣凡四

薛氏曰漢

都肄已有孫吳六十四陳竇憲嘗勒八陳擊匈奴晉馬

隆八用八陣以復涼州陳勰持白虎幡以武侯遺法教

五營士是則武侯之前既有八陳後亦未嘗亡也今有

馬隆握竒圖贊其傳起於風后嚴從曰武侯所習風后

五圖也桓溫云是常山蛇勢徒妄言耳常山蛇者法出

孫子謂之率然蓋高直陣也洪氏曰八陣魁六十有

四重易之卦也却月魁二十有四作易之畫也畫起於圓而神故却月之形圓卦定於方以知故八陣之體方方居前而圓居後卦自畫始方自圓生也壁門直裒曲折翼其旁則陰陽二物握奇則有虛一之象 孫子注

杜牧

數起於五而終於八今夔州諸葛武侯以石縱橫八行為方陣奇正之出皆生於此奇亦為正之正正亦為奇之奇彼此相用循環無窮也諸葛出斜谷以兵少但能正用六數今盤屋司竹園乃有舊壘司馬以四十萬

步騎不敢決戰蓋知其能也

又引武侯曰水上之陣逆其流

殷芸小說

於漢中積石作八陣圖

太平御覽諸葛亮軍令曰連

衝陣狹而厚也敵以來進持鹿角兵悉却在連衝後

晉馬隆依八陣圖作偏箱車

通典後魏柔然犯塞刁

雍上表採諸葛八陣之法為平地禦寇之方 後周信

州舊治白帝陸騰徙之於八陣灘北

李靖問對太宗

曰六花陣法出何術靖曰臣所論本諸葛亮八陣法也

杜甫詩功蓋三分國名成八陣圖

蘇軾詩平沙何

茫茫彷彿見石絕縱橫滿江上歲歲沙水齧孔明死已久誰復辨行列神兵非學到自古不留訣至人心已悟後世徒妄說 蘇氏曰司馬法曰五人為伍五伍為兩萬二千五百人而為軍二百五十取三馬而為奇其餘十以為正四奇四正而八陣生焉夫以萬二千五百人而均之八陣之中宜其有奇而不齊者是以多為之曲折以盡其數以極其變鉤聯蟠屈各有條理故三代之興治其兵農軍賦皆數十百年而後得志於天下自周

之亡秦漢陣法不復三代其後諸葛猶識其遺制以為可用

魏園陣

魏志田豫征代郡北虜以騎擊之豫以車為園陣弓弩持滿於內胡不得進遂舍而去

晉八陣圖

馬隆傳依八陣圖作偏箱車李靖問對晉馬隆討涼州亦是依八陣圖作偏箱車馬隆八陳贊正陳

天陳 地陳 風陳 雲陳

自太公范蠡以來風雲無定形所以附天地

奇兵 飛龍 翔鳥 地蟠

虎翼

合而為一離而為八

遊軍 金革 鞞鼓 麾角 兵休

晉却月陣

通鑑義熙十三年劉裕擊魏魏人以數千騎緣河隨裕軍西行四月裕遣丁旡帥仗士七百人車百乘渡北岸去水百餘步為却月陣兩端抱河車置七仗士事畢使監一白眊裕先命朱超石戒嚴眊舉超石帥二千人馳

赴之魏人以三萬騎圍之四面內薄弩不能制超石斷
稍千餘皆長三四尺以大鎚鎚之一稍輒洞貫三四人
魏兵奔潰 宋朝康定元年郭遵與趙元昊皆為偃
月陣

後魏十二陣圖

源賀依古今兵法及先儒耆舊說略採至要為十二陣
圖上之

後魏 齊 周 隋陣法

後魏和平三年因歲除大儺遂耀兵示武更為制令步兵陳於南騎士陳於北各擊鐘鼓以為節度其步兵所衣青赤黑黃別為部隊楯二稍矛戟相次周迴轉易以相赴就有飛龍騰蛇之變為函箱魚鱗四門之陣凡十餘法跪起前却莫不應節陣畢南北二軍皆鳴鼓角衆盡大譟各令騎將六千人去來挑戰步兵更進退以相拒擊南敗北捷以為威觀自後以為常 後齊常以季秋皇帝講武於都外有司先萊野為場為二軍進止之

節凡為陣少者在前長者在後其還長者在前少者在後長者持弓矢短者持旌旗勇者持鉦鼓刀楯為前行戰士次之禦者次之弓箭為後行將帥先教士目使習旌旗指麾之蹤發起之意旗卧則跪教士耳使習金鼓動止之節聲鼓則進鳴金則止教士心使知刑罰之苦賞賜之利教士手使習持五兵之便戰鬪之備教士足使習跪及行列嶮泥之塗前五日皆請兵嚴於場所依方色建旗為和門都墀之中及四角皆建五采牙旗云云

二軍迭為客主從五行相勝法為陣以應之 後周仲
春教振旅大司馬建大麾於菜田之所鄉稍之官以旂
物鼓鐸鉦鈹各帥其人而致建麾於後表之中以集衆
庶質明偃麾乃陳徒騎如戰之陳大司馬北面誓之軍
中各聽鼓角以為進止之節諸將帥徒騎序入和門而
分其地險野則徒前而騎後易野則騎前而徒後既陣
皆坐乃設驅逆騎有司表貉於陣前云云隋大業七年
征遼東衆軍將發御臨朔宮親授節度每軍大將亞將

各一人騎兵四十隊隊百人置一纛十隊為團團有偏將一人第一團皆青絲連明光甲鐵具裝青纓拂建狻猊旗第二團絳絲連朱犀甲獸文具裝赤纓拂建狻猊旗第三團白絲連明光甲鐵具裝素纓拂建辟邪旗第四團烏絲連玄犀甲獸文具裝建六駁旗前部鼓吹一部大鼓小鼓及鼙長鳴中鳴等各十八具柶鼓金鈺各二具後部鈇吹一部鈇二面歌簫及笳各四具節鼓一面吳吹簫篳篥橫笛各四具大角十八具又步卒八十隊

分為四團團有偏將一人第一團每隊給青隼盪幡一
第二團每隊黃隼盪幡一第三團每隊白隼盪幡一第
四團每隊烏隼盪幡一長禦植弩及甲眊等各稱兵數
受降使者一人給二馬輅車一乘白獸幡及節每一騎
吏三人車輻白從十二人承詔慰撫不受大將制戰陣
則為監軍軍將發候大角一通步卒第一團出營東門
東向陣第二團出營南門南向陣第三團出營西門西
向陣第四團出營北門北向陣陣四面圍營然後諸團

嚴駕立大角三通鈇鼓俱振第一團引行隊間相去各十五步次第二團次前部鼓吹弓矢一隊合二百騎建蹲獸旗炮槊二張大將在其下次韃馬二十匹次大角次後部鈇吹次第三團次第四團次受降使者次及輜重戎車散兵等亦有四團第一輜重出收東面陣分為兩道夾以行第二輜重出收南面陣夾以行第三輜重出收西面陣夾以行第四輜重出收北面陣夾以行亞將領五騎建騰豹旗殿軍後至營則第一團騎陣於東

面第二團騎陣於南面鼓吹翊大將軍居中駐馬南向
第三團騎陳於西面第四團騎陣於北面合為方陣四
面向步卒翊輜重入於陣內以次安營營定四面陣
者引騎入營亞將卒驍騎遊奕督察其安營之制以車
外布間設馬槍次施兵幕內安雜畜事畢大將亞將等
各就牙帳其馬步隊與軍中散兵交為兩番五日而代
於是每日遣一軍發相去四十里連營漸進二十四日
續發而盡首尾相繼鼓角相聞旌旗亘九百六十里



玉海卷一百四十二

欽定四庫全書

玉海卷一百四十三

宋 王應麟 撰

兵制

陣法

唐講武五陣

禮志講武於都外前期十一日所司奏請講武兵部承
詔遂命將帥簡軍士有司先芟草除地為場方千二百

步四出為和門又於其內墀地為步騎六軍營域處所
左右廂各為三軍皆上軍在北中軍次之下軍在南東
西相向中間相去三百步五十步立表一行凡立五行
表間前後各相去五十步為二軍進止之節又別墀地
於北廂南向為車駕停觀士處前一日講武將帥及士
卒集依方色建旗為和門於都墀之中及四角皆建以
五綵牙旗旗鼓甲仗威儀悉備於墀所大將以下各有
統帥如常式步軍大將被甲胄乘馬教騎大將亦乘馬

教習士衆為戰隊之法凡教為陣少者在前長者在後其還則長者在前少者在後長者持弓矢短者持戈矛力者持旌旗勇者持鉦鼓刀楯為前行持稍者次之弓箭為後行將帥先教士衆習見旌旗指麾之蹤旗卧則跪旗舉則起習金鼓動止之節聲鼓則進鳴金即止知刑罰之害賞賜之利持五兵之便戰鬪之備習串跪起及行列險隘之路講武日未明十刻軍士皆嚴備五刻將士皆貫甲步軍各為直陣以相俟講武日鼓三嚴諸

衛各督其隊與鈇戟以次入陣於庭侍衛之官奉迎皇帝至講武所云云三鼓有司偃旗步士皆跪云云大將誓以警衆諸果毅各以誓詞通告遂聲鼓有司舉旌士衆皆起騎從皆行及表擊鉦騎從乃止又擊三鼓有司偃旗衆皆跪又擊舉旗衆皆起騎驟徒趨及表乃止整列位定東軍一鼓舉青旗為直陣西軍亦鼓舉白旗為方陣以應次西軍鼓舉赤旗為銳陣東軍亦鼓舉黑旗為曲陣以應次東軍鼓舉黃旗為圓陣西軍亦鼓舉青旗為

直陣以應次西軍鼓舉白旗為方陣東軍亦鼓舉赤旗
為銳陣以應次東軍鼓舉黑旗為曲陣西軍亦鼓舉黃
旗為圓陣以應凡陣迭為主客先舉者為客後者為主
從五行相勝之法為陣以應之每變陣二軍各選刀楯
之士五十人挑戰於兩軍之前第一第二挑戰迭為勇
怯之狀第三挑戰為敵均之勢第四第五挑戰為勝敗
之形每將變陣先鼓為直陣後變從餘陣之法五陣畢
兩軍俱為直陣又擊三鼓有司偃旗衆皆跪又聲鼓舉

旗衆皆起騎馳徒走左右軍俱至中表相擬擊而還騎
軍東西迭為主客為主相勝之陣皆如步軍之法每陣
各以騎挑戰於兩陣之間如步軍法五陣畢俱大擊鼓
而前盤馬相擬擊而罷退振旅而還 顯慶五年三
月八日講武并州城北左為曲直圓銳之陣右為方
銳直圓之陣三挑而五變步退而騎進五合而各復
位

唐七軍

通典衛公李靖兵法曰大將出征且約授兵二萬人即
分為七軍

唐五法

闕

唐六花陣

李靖問對太宗曰卿所制六花陣法出何術靖對曰臣
所本諸葛亮八陣法也大陣包小陣大營包小營隅落
鉤連曲折相對古制如此臣為圖因之故外畫之方內

環之圓是成六花俗所號耳太宗曰內圓外方何謂也靖曰方生於正圓生於奇方所以規其步圓所以綴其旋是以步數定於地行綴定於天步定綴齊則變化不亂八以步處定於地行綴定於天步定綴齊則變化不亂八陣為六武侯之舊法馬太宗曰卿六花陳畫地幾何曰大閱地方千二百步者其義升陣各占地四百步分為東西兩廂雲地一千二百步為教戰之所臣嘗教士三萬每陣五千人以其一為營法五為方圓曲直銳之形

每陳五變凡二十五變而止

唐四獸陣

李靖問對太宗曰四獸之陣又以商羽徵角象之何道靖曰詭道也假以四獸之陣又加商金羽水徵火角木之配此皆兵家自古詭道也曲禮行前朱鳥而後玄武左青龍而右白虎注以此四獸為軍陣象天也疏此明軍行象天文而作陳法也前南後北左東右西朱雀玄武青龍白虎四方宿名也軍前宜捷故用雀軍後須

殿捍故用玄武玄武龜也左為陽陽能發生象其龍變
生也右為陰陰沈能殺虎沈殺也何胤云如鳥之翔如
蛇之毒龍騰虎奮無能敵此四物鄭注四獸為軍陳則
是軍陣之法也但不知何以為之耳今之軍行畫此四
獸於旌旗以標前後左右之軍陣

唐五行陣 五色旗

李靖問對太宗曰五行陣如何靖曰本因五方色立此
名方圓曲直銳實因地形使然凡兵不素習此五者安

可臨敵乎兵詭道也故強名五行焉文之以行數相生
相克之義兵形象水因地制流 李靖傳其舅韓擒虎
每與論兵輒歎曰可與語孫吳非斯人而誰其後平蕭
銑於江陵列城爭下禽輔公祐於丹陽而江南平帝曰
古韓白衛霍何以加後為定襄總管以騎三千蹠血虜
庭禽頡利斥地自陰山止至大漠後為西海總管平吐
谷渾世言靖精風角鳥占雲祲孤虛之術是不然特以
臨機果料敵明根於忠智而止 崇文目五陣圖一卷

通典李靖兵法曰諸軍將五旗各准方赤南方火白西方金皂北方水碧東方木黃中央土土既不動用為四旗之主而大將行動持此黃旗於前立如東西南北有賊各隨方色舉旗當方面兵急須裝束旗向前亞方面兵急須進旗正豎即往卧即迴審細看大將軍所舉之旗須依節度諸每隊給一旗行則引隊住則立於隊前其大總管及副總管則立十旗以上子總管則立四旗以上行則引前往則立於帳側統頭亦別給異色

旗擬臨陣之時則辨其進退駐隊等旗別樣別造令引輜重令本軍營隊識認如兵多營衆各別畫禽獸標記不然旗身脚但取五方色迴互為之務使指麾分明諸教戰陣每五十人以為隊云云一云凡教旗於平原曠野登高遠視處大將居其上南向左右各置鼓角十二左右各樹五色旗六纛居前列旗次之左右牙官駐隊如偃月形為後騎下臨平野使士卒目見旌旗耳聞鼓角心存號令云褚遂良太宗冊天兵電掃月陣風驅

唐武德五兵八陣圖法要

志一卷

唐飛騎戰陣圖

呂才傳太宗詔才造方域圖及教飛騎戰陣圖屢稱旨

唐修八陣圖經

會要開元十七年十一月上令左相張說修八陣圖十卷及經二卷成

唐黃公太公二陣圖

李靖問對太宗曰深乎節制之兵得其法則昌失其法則亡卿為纂述歷代善於節制者具圖來上朕當擇其微垂於後世靖曰臣前進黃公太公二陣圖并司馬法諸葛亮奇名之法此已精絕歷代各將用其一二成功者亦衆矣但史官鮮克知兵不能紀其實迹臣敢不纂述以聞太宗曰兵法孰為最深者靖曰臣嘗為分三等使學者當漸至焉一曰道二曰天地三曰將法

文苑英華王叡二陣圖論 文心雕龍六韜二論後人

追題六韜霸論

典文論文帥武論 杜牧作罪言原十六衛作戰論中

論

裴緒八陣

見後

新令

志裴子新令二卷

乾德陣圖

乾德元年閏十二月龍棲軍校王明詣闕獻陣圖

太平興國陣圖

太平興國四年契丹入寇鎮州都鈐轄劉延翰帥衆禦之先定於滁河崔彥進潛師出黑盧隄北緣長城口銜枚躡虜後崔翰兵繼至先是上以陣圖示諸將俾分為八陣至是虜騎至趙延進乘高望之東西亘野不見其尾翰等方按圖布陣相去百步延進謂翰等曰今虜騎若此而我師星布彼若乘騎我將何以濟不若合而擊之李繼隆亦曰

兵貴通變安可預料於是分二陣前後相副大破之是年曹翰遣五駿騎為斥候授以五色旗人執其一前有林木則舉青旗烟火舉赤旗虜寇舉白旗陂澤舉黑旗丘陵舉黃旗先是虜至必舉狼烟翰分遣人舉烟境上虜疑有伏引去元年十一月閱武殿使騎兵步兵各數百東西列陣上曰此殿庭閱數百人爾猶兵威可觀況堂堂之陣數萬成列乎

雍熙平戎萬全圖

雍熙四年五月庚寅上製平戎萬全圖以示宰相樞密院及掌兵將校凡九圍共成一陣內三為方陣一為前鋒一為後殿二為左翼三為右翼凡中心連排方陣三每陣三各大將一人主之其陣各方五里又相去一里東西占十七里每陣周回二十里計七千二百步每五步為一地分用戰車一乘兵士二十二人一陣計一千四百四十地分戰車千四百四十乘地分兵士三萬一千

六百八十八人無地分兵士五千人以三十人為一隊
計百六十六隊餘二十人其兵士隊於二陣前列行東
西陣各用騎兵萬人解鎧分為兩行配五十騎為一隊
計百二十五陳三路標馬計三十隊每路各陳圖子排
列計百六十五騎前後陣各用騎五千解鎧分為兩行
配五千人騎為一隊計六十二隊後行配三十人騎為
一隊計六十三隊餘十五人路探馬計五十隊每路各
陳圖子排列計二百七十五騎三陣圖凡用兵士十四

萬九百三十人時虜未殄太宗嘗驛召邊將潘美田重
進崔翰王承衍等入對并召在京掌兵將帥訪以備邊
之策帝又親為規制為此圖以示之 實錄上製平戎

萬全圖出示近臣因召邊將田重進潘美崔翰等升殿
親授其進退攻擊之方略重進等頓首謝 呂祖謙贊

嗚呼休哉平戎萬全太宗所製在漢高祖君魯臣智兵
不沿中韋雄外驚光武龍飛君強臣弱寇鄧景賈咸授
方略我之藝祖光武是若於皇太宗亦我藝祖沈幾英

斷超今襲古法駕徂征并汾納土八埏九域方圓肅載
銷戈鑄鎛無有內外太宗曰吁武不可怠天下雖安忘
戰必危吾謀既定疇協予咨臣美臣進驛召必來日幾
天衛羣帥如虎僉奏具陳什什伍伍孰否孰去孰臧孰
取審斷臨之要領悉畫迺畫方圖以詔郡國中營參運
左右駢翼前鋒啟途後殿從之內環臨衝外騎畢馳戈
矛林立劒盾紛施部分行列星明舉燎首尾舁脇交杖
互繞離合啟閉不可盡曉二府元臣干廬列校拜首稽

穎惟帝之教神謨聖略出入天巧漢有八陣平沙是列
唐有六花取數於八孰如此圖慮天之法以此衆戰孰
能禦之開邊拓境惟帝使之犂庭掃穴挽河洗之帝曰
無庸安邊是務於我子孫以禦外侮皇帝在御思念祖
宗觀圖效法振武平戎王旅萬全朔庭其空告於清廟
以樂太宗嗚呼休哉

至道崇政殿教陣圖

至道二年九月夏州延州行營言兩路合勢破賊於烏

白池賊首李繼遷遁去上初以方略授諸將將先閱兵於崇政殿列陣為攻擊之狀刺射之節且令多設强弩及遇賊布陣萬弩齊發賊無所施其技矢才一發賊皆失走凡十六戰皆捷上因顧傅潛常曰大抵行軍布陣當務持重布陣乃兵家大法非常情所究朕自為陣圖與王超令勿妄示人超回曰汝可取圖觀之先是運糧靈州上亦令丁夫悉持弓矢為方陣而行寇至則成列待之後諸將亦卒以違節制致敗

咸平御軍陣圖

咸平四年十月詔高陽關三路兵增騎二萬為前鋒又命將五人各領騎三千陣於先鋒之前命桑贊領萬人為奇兵荆嗣領萬人以斷西山之路仍列繪為圖遣示王顯等曰設有未便當極言之 閏十二月甲午上問王超計策超上二圖其一置資糧在軍中布兵周防賊無以鈔略其一遇賊即變而為方陣陣形之外分列游兵持勁弩賊至則易聚而可并力圖頗采李靖輜重法

上甚獎之

咸平三十二陣圖

咸平二年十二月車駕親征河北辛酉內出陣圖示殿
前都指揮使王彥超等令識其部分三年六月戊寅內
出陣圖三十二以示輔臣 一本云咸平二年契丹入
寇車駕幸河北內出陣圖示王彥超等一實錄咸平二
年八月丙寅大閱東武村王超執五方旗以進退又以
行列遐遠號令所不能及遂於兩陣中起候臺相望使

人執旗如臺上招之初舉黃旗則諸軍旅拜舉赤旗則
騎進舉青旗則步進每旗動則鼓作而士譟之聲振于
百里皆三挑而後退次舉白旗則諸軍復拜逐黑旗以
振旅軍於右者畧左陣以還詳見講武

咸平陣圖 景德陣圖 慶厯陣圖

咸平四年六月戊辰二十九日對輔臣於崇政殿觀陣
圖上曰北戎寇邊常遣精悍為前鋒若捍禦不及即有
侵軼之患今盛選銳兵命驍將統領別為一隊遇其奔

衝彼既挫銳而退其餘望風不敢進矣又始遣騎兵出陣後斷糧道又別選良將領數萬師殿其後則無慮矣六年六月自望都失利上日訪禦戎之策因命兩府會議李沆等或請合鎮定州寇來堅守勿逐俟信宿寇疲則挑戰又量分兵屯威虜及保州北平三處使其腹背受敵又量分兵屯寧邊軍及邢州扼東西路長編咸平六年六月御便殿內出陣圖示輔臣曰今虜勢未憚猶須過防屯兵雖多必擇精銳先據要害以制之凡鎮

定高陽正路兵悉會定州夾唐河為大陣以騎卒居中步卒環之短兵接戰毋離保伍 馮拯建議今防秋宜於唐河增屯兵至六萬控定武之北為大陣邢州置都部署為中陣天雄軍置鈐轄為後陣上多采

用其議

本傳云上從之按所出陣圖不書依拯言

景德元年八月乙卯

帝御崇政殿後廡出陣圖示輔臣十一月駕幸澶淵親征乙亥內出陣圖二一行正付殿前都指揮使高瓊等 慶厯五年帝御邇英閣進讀三朝經武要略

是日出陣圖數本并陝西僧所獻兵器鐵揮撥以示
講讀官六年六月壬申詔河北教閱諸軍並用祖宗
舊定陣法其後來所易陣圖亦令主將間習之 咸
平三年八月王均自升仙之敗因壘依濠為土山分
設鹿角造梯衝洞車攻具石普專主之奏翰設雁翅
勢敵棚覆洞車以進逼羅城賊亦對敵棚號喜相逢
樓九月戊寅官焚其敵樓 慶厯八年四月明鎬言貝
州築矩闔賊亦於城上設戰棚與官軍相當名曰喜相

逢

咸平鞭箭陣圖

咸平六年十月己卯殿前都指揮使高瓊上鞭箭陣圖

咸平崇政殿教三陣

咸平六年十一月己亥御崇政殿閱捧日軍教三陣一曰連珠必勝二曰應機摧敵三曰應捷五虎節以金鼓戎容甚整事訖復命強弓勁弩及鬪槊以角勝技其趨勇者第遷之仍賜緡錢卮酒

祥符北面榆柳圖

祥符五年十月

景德初真宗訪馮拯以邊事拯謂備邊之要當須扼襟
喉據險隘以制敵之衝若於保州威虜間依徐鮑河以
布陣裏糧其勢足以決勝今防秋請於定州北唐河增
屯軍馬至六萬為大陣邢州置都總管為中陣天雄軍
置鈐轄為後陣而罷莫州狼山兩路屯兵從之

天禧飛山雄武營習戰陣

天禧二年四月戊子幸彰化橋北飛山雄武營教場駐蹕幄殿命諸軍衛士發砲石習戰陣藝精者四十四人遷擢宴從臣仁宗十有二年幸安肅教場觀飛山雄武發砲又命上四軍虎翼為戰陣之法

天聖崇政殿閱戰陣

天聖五年九月庚戌御崇政殿召輔臣閱龍衛神勇等軍習戰陣遂命射第進補七年十月壬寅御崇政殿閱虎翼武騎習軍陣遷補有差

景祐崇政殿觀陣圖

咸平二年八月先是詔有司擇地於含輝門外為廣場
上至行營諸軍陣於臺府云云又於兩陣中起候臺相望
六年九月募近京城強壯補禁衛詔高瓊閱習陣勢
召近臣觀之上覩行伍整肅喜曰昨日村氓皆為精銳
矣

康定便殿閱陣

康定七年七月十五日庚午御延和殿閱諸軍習陣法

上封事者言諸軍止教坐作進退雖整肅可觀然臨敵
難用請自令遣官閱陣畢令解鎧以弓弩射營置弓三
等自一石至八斗弩四等自一石八斗至二石五斗以
次閱習詔行之陝夷經略安撫副使韓琦言昨諸班中
選武藝優者為寨主監拘然拘於一城未能各適其用
欲下陝西諸部主司分所武中人鄜延路十五員環慶
涇原秦鳳路十員為逐路教押軍陣以士卒所習精粗
賞罰如此則老懦者不能自容勇壯者各思奮身復免

主將爭占精兵專為已衛也鄜延鈐轄張亢上疏請下
韓琦范仲淹分按逐路以馬步軍八千上止萬人擇才
位兼高者為總管其下分為三將一為前鋒一為策前
鋒一為後陣每將以使臣將佐三二人分屯要害之地
若賊小入則一將出大入則大將出量賊數多少又使
數路兵應援之此所謂常山蛇勢也 元年三月以
高志寧為河北諸州軍安撫使元昊初反志寧時
知隰州上言請乘賊未發選驍將銳兵急趣所

謂疾雷不及掩耳章數十上不報至是思其言召至闕
問今宜為何策志寧曰今將不達權而兵不識法故敗
乃請禁兵五百以故陣法教之既成上臨試之

皇祐弓箭手陣圖

皇祐三年正月涇原經略使夏安期上弓箭手陣圖初
安期選弓箭手三千人分隸東西路都巡檢下屬歲豐
稔召至州大閱技藝精強且言可當正兵五七萬既圖
上陣法乃降詔獎諭

皇祐崇政殿閱陣法

皇祐元年四月甲子御崇政殿閱知澧州供備庫副使
宋守信所獻衝陣無敵流星弩拒馬竹皮牌火鐮石火
鋼三刃黑漆順水槍山字鐵甲野戰拒馬刀弩寨腳車
衝陣劔輪無敵車大風翎弩箭八種

至和八陣圖

至和二年四月甲寅代州兵馬鈐轄蘇安靜上八陣圖
降勅獎諭

至和御製攻守御圖

見兵法

嘉祐八陣圖

嘉祐四年六月四日翰林學士胡宿看詳駕部員外郎

尹瞻所進裴子新令及八陣圖頗精降詔獎諭

唐志裴子新令

二卷書目采拾諸家部伍習陣之法五行諸形勢凡三

十二篇

熙寧崇政殿閱陣法

熙寧三年五月五日丁未詔以涇原路蔡挺衙校陣隊
於崇政殿引見仍頒其法於諸路 長編三年十月涇
渭儀原四州義勇萬五千人舊止戍守經略使蔡挺始
令遇上番依諸軍結陣隊分隸諸將與正兵相叅戰守
熙寧元年狄青子諂奏事延和殿上問青征南有遺書
存否諂上平蠻記及歸仁鋪戰陣二圖

熙寧議隊法 結隊圖

熙寧七年六月上論結隊法因歎州兵之難以謂今之

邊城曉知奇正之體者已自無人況奇正之變乎且天地五行之數不過五數五陣之變出於自然非強為耳韓絳曰臣昔嘗謂置講說之官令諸路帥各具戰陣之法來上取其所長立以為法上可之乃詔五路安撫使各具可用陣隊法及訪采知陣隊法者陳所見以聞

九月上與輔臣論戰陣之法因曰兵陰事也主殺尚右而陽多者勝如高者可以勝下長者可以勝短是也內出攻守圖二十五部賜河北又出敵樓樣造軍器監頒

降修製 十月上以新定結隊法并賞罰格及置陣形勢等遣近侍李憲付鄜延帥趙高俾講求推及諸路於是高奏伏詳置陣之法以結隊為先今聖制雖與古同而用法尤為精密此蓋陛下天錫勇智不待學而後能也然而議者云四十五人而一長不若五人而一長之密且以五人而一長即五十人而十長也推之於百千萬則為長多而統制不一也至如周制五人為伍屬之比長五伍為兩屬之間胥四兩為卒屬之族師五卒為旅

屬之黨正五旅為師屬之州長五師為軍屬之命卿此
猶今之軍制百人為都五都為營五營為軍十軍為廂
四廂都指揮使而下各有節級有員品亦昔之比長間
胥族師黨正之任也況八陣之法久失其傳聖制煥然
一新稽之前聞若合符節蓋法制一定易以致人臣有
所見不敢不聞 九年五月詔諸保甲可依新降隊
法結隊并印新結隊圖付兵部每一都保給與一
圖結隊之法三人為一小隊三小隊為一中隊五

十隊為一大隊并引戰一人居前擁隊一人執刀
居後兼二人居左右執旗一人居中凡五十人皆
選士也有馬人與無馬人各為隊隊中兵械或
純用一色或雜用弓弩刀斧槍楯皆於結隊時
商定取旨

熙寧八軍法

熙寧八年二月戊寅上批見校試七軍營陣以分數不
齊前後牴牾難為施用可令見校試官採其可取者草

定八軍法以聞初詔樞密院唐李靖兵法世無全書雜見通典離析譌舛又官號物名與今稱謂不同武人將佐多不能通其意可令樞密院兵房檢詳官與檢正中書刑房王震等四人校正分類解釋令今可用後又差樞密副都承旨張誠一入內押班李憲與震等行視寬廣處闕殿前司差馬步軍二千八百人教李靖營陣法以步軍副都指揮使楊遂為都大提舉誠一憲為同提舉震及郭逢原參議公事夏元象臧景等為將副部隊

將勾當公事凡三十九人誠一等初用李靖六花陣法約受兵二萬人為率為七軍內虞候軍各二千八百人取戰兵千九百人為七十六隊戰兵內每軍弩手三百弓手三百馬軍五百跳盪四百奇兵四百輜重每軍九百是為二千八百人上諭李憲等曰黃帝始置八陣法敗蚩尤於涿鹿諸葛亮造八陣圖於魚復平沙之上壘石為八行晉桓溫見之曰常山蛇勢也文武皆莫能識之此即九軍陣法也後至韓擒虎深明其法以授其甥

李靖靖以時遭久亂將帥通曉其法者頗多故造六花陣以變九軍之法使世人不能勝之大抵八陣即九軍九軍者方陣也六花陣即七軍七軍者圓陣也蓋陣以圓為體方陣者內圓而外方圓陣則內外俱圓矣故以方圓物驗之則方以八包一圓以六包一此九軍六花陣之大體也六軍者左右虞候各一軍為二虞候軍左右廂各二軍為四廂軍與中軍共為七軍八陣者加前後二軍共為九軍本朝祖宗以來置殿前馬步軍三帥

即中軍前後軍帥之別名而馬步軍都虞候是為二虞候軍天武捧日龍神衛四廂是為四廂軍也中軍帥總九軍即殿前都虞候專總中軍一軍之事務是其名實與古九軍及六花陣相符而不少差也今論兵者俱以唐李荃太白陰經中所載陣圖為法失之遠矣今可約李靖法為九軍營陣之制然李荃之圖乃營法非陣法也朕採古之法酌今之宜曰營曰陣本出于一法而已止則曰營行則曰陣奇正言之則營為正陣為奇也

是年八月丁巳大閱八軍陣於城南之荆家陂

熙寧二年十一月癸未管勾鄜延路機宜文字趙高言
乞詔多聞博識之士講求諸葛亮八陣法以授邊將使
知應變詔郭達與高講求其法度本地路形定為陣圖
以聞熙寧收復熙河陣法三卷觀文學士王韶撰
元豐飛虎立成陣圖

元豐六年五月壬午東方戒上飛虎立成陣圖步人制
戎騎法乞面陳利害詔樞密院召問之元豐三年

趙高言今欲大閱漢蕃陣隊且以萬二千五百人
為法旌旗麾幟各隨方色戰國時大將之旗以龜
為飾蓋取前列先知之義今中軍亦宜以龜為號其八
隊旗別繪天地風雲龍虎鳥蛇天地則狀其方圓風雲
則狀其飛揚龍虎則狀其猛厲鳥蛇則狀其翔盤之勢
以備大閱樞密院言陣隊旗號若繪八物慮士衆難辨
且其間亦有無形可繪者遂詔大閱旗幟止依方色仍
異其形制令勿雜而已

元豐五陣法

元豐七年六月十七日降五陣法令諸將教習 元祐
元年二月殿前馬步軍言準朝旨相度到高翔上
言依舊教閱御陣子事欲於教陣日與新陣法相兼詔
遇教陣隔日更互教習先是神考置九軍營陣為方圓
曲直銳凡五變為五陣遂罷教習陣至是後以舊陣互
教

建炎五車隊

建炎元年始頒樞密院教閱格法凡經兩閱者每五十人為一隊隨隊多少分隸五軍謂如五百人每隊五十人即每軍兩隊之類人多依此每軍各置旗號以顏色樣制物號為別謂前軍用緋旗以飛鳥為號後軍皂旗龜為號左軍青旗蛟為號右軍白旗虎為號中軍黃旗以神人為號又別以顏色樣制物號錯招旗分旗舉招旗則五軍以旗相應合而成陣舉分旗則五軍以旗相應分而成隊左右前却或分藏為伏或分出為奇並舉

旗為號並更鳴小金應鼓為號以備望旗不及預約伏
藏之處慢打小金即住急打應鼓即奇兵出陣趨戰急
打小金即伏兵出 建炎三年呂頤浩奏曰天下多事
聖哲馳驚而不足虜近復引兵渡河駐於澶濮之境臣
願廟算先定申飭諸州訓習强弩以俟夾淮一戰夫虜
兵雖勇而無陣法若節制之兵一敗必至顛沛但令主
帥倣古陣法常山蛇勢雖茫昧不傳而陣圖別有可攷
願早圖之 紹興二十六年吳玠領御前諸軍都統制

判興州璘嘗著書號兵要大略謂金人有四長我有四短當反我之短以制彼之長至於陣法則有圖而無書焉

隆興車陣圖

隆興元年八月六日進呈陳敏軍中教習車陣圖

乾道三陣

見講武

乾道四年十月十六日辛茅灘大閱上親御甲冑指授方畧命三司合教為三陣戈甲耀日旌旗蔽天六師驩

呼犒費有加焉 淳熙四年十二月辛茅灘大閱殿帥
王友直舉旗五陣畢十二年復大閱於龍山管軍舉青
旗變三直陣鼓音作分六行舉白旗聚為四陣舉緋旗
為二陣舉阜旗為一陣繼又散為六行舉一鼓變品字
作三陣 淳熙二年知荆門黃茂才言李靖六花陣法
出於武侯嘗因陞對畫圖以進比帥司奉詔令州軍見
管民兵以七十五人為一小陣正合李靖兵法遂將本
軍義勇兵或分為七軍每軍旗幟各別色號置造兵器

皇上今冬躬自教習大陣包小陣大營包小營陣落相連曲折相對可以成六花陣法今將本軍民兵自教兩月却令荆南差知兵將官一員閱視從之

唐李光弼與史思明戰北邙使傅山陣僕固懷恩請陣諸原光弼曰有險可以勝可以敗陣於原敗斯殲矣且賊致死于我不如阻險不從軍大潰 五代梁謝彥章幼事葛從周授以兵法以千錢置大盤為行陣偏伍之狀示以出入進退之節彥章盡得之 唐郝廷玉善布

陣魚朝恩請觀之歎曰吾處兵間久今始識訓練
法廷玉曰比臨淮沒無復校旗事此何賞哉 北

齊許遵善占候芒陰之役遵謂李業興曰賊為水
陣我為火陣必敗果如其言 唐高宗問員半千

兵家有三陣何也半千曰古者星宿孤虛天陣也
山川向背地陣也偏伍彌縫人陣也臣謂不然師
以義出沛若時雨得天之時為天陣足食約費且
耕且戰得地之利為地陣舉三軍士如子弟從父

凡得人之和為人陣帝曰善 咸平三年何承矩
曰兵家有三陣日月風雲天陣也山陵水泉地陣
也兵車士卒人陣也 易師左次註行師之法欲
右背而高故左次 書不愆於四伐五伐六伐七
伐乃止齊焉伐謂擊刺 孫子夜戰多火鼓晝戰
多旌旗所以變人之耳目也故朝氣銳晝氣惰暮
氣歸故善用兵者避其銳氣擊其惰歸無邀正正
之旗無擊堂堂之陣 吳子鼓鞀金鐸以威耳旌

麾旂章以威目禁令刑罰以威心 六韜以一擊

十莫善於阨以十擊百莫善於險以千擊萬莫善
於阻用衆者務易用少者務阨也 貝冑朱綬流


星白羽肅其戎容行行伍伍前壘楊葉後貫戟枝
連袂逢蒙比肩由基 劒躍長虹弓翻滿月怒氣

回薄髮衝眦裂靜如盤石動如飄風出奇入正滅
沒無蹤 謀如湧泉勢如轉規兵動有功師進輒

克 百樓忽起登雲霄而俯臨萬弩俱發隨雷霆

而並震揚兵於九天之上決勝於千里之中拔
距從軍揚麾挑戰征旆凌沙漠戎行起霜霰戈文
耿耿懸落星馬足駸駸擁飛電終取後而先鳴豈
論功而後殿叱咤則江山搖蕩指揮則林壑飛
騰舉鵬力以揚威耀犀渠而賈勇擁拔山起海
之雄驅籊景騰雷之騎火千旗而四面風動雷
萬鼓而一道地裂勇冠三軍衆無一旅橫倚天
之劍揮駐日之戈吟嘯四顧熊羆兩集上可以決

天雲下可以絕地維
翕振虎旅赫張王
帥退如山立進若電逝
紛紜沸渭雲合電發
機駭蠶軼炎騰波流
七萃連鑣九游齊軌
羣師壘伍神扶電擊
雲徹席卷星流彗掃



玉海卷一百四十三

欽定四庫全書

子部

玉海卷一百四十五

詳校官中書

臣張經田

主事臣祁韻士覆勘

總校官進士

臣朱鈐

校對官編修

臣沈清藻

謄錄監生

臣黃臣鵠

欽定四庫全書

玉海卷一百四十四

宋 王應麟 撰

兵制

講武 田獵上

春秋傳曰春蒐

振

夏苗

蒐

秋獮

治

冬狩

大

皆於農隙

以講事三年而治兵入而振旅歸而飲至以數軍實

昭文章明貴賤辨等列順少長習威儀也

夏殷四時田

王制天子諸侯無事則歲三田一為乾豆二為賓客三為充君之庖注三田者夏不田蓋夏時也疏案穀梁傳春曰田夏曰苗秋曰蒐冬曰狩何休云運斗樞曰夏不田穀梁有夏田於義為短鄭玄釋之云四時皆田夏殷之禮詩云之子于苗選徒囂囂夏田明矣公羊既見緯文故以為三時田又鄭釋廢疾云歲三田謂以三事為田即一曰乾豆之等大綏小綏是夏殷之法秋冬皆用

綏異於周也夏不田蓋夏時也夏生長之時禹以仁得

天下故不田月令季秋之月天子乃教於田獵以習

五戎

教於田獵因教民以戰法也

孟冬講武注凡田之禮唯狩最備

夏小正十一月王狩左傳春蒐夏苗秋獮冬狩疏公

羊春曰苗秋曰蒐冬曰狩穀梁春曰田夏曰苗秋曰蒐

冬曰狩皆與禮異丘明獨與禮合白虎通義因穀梁為

之說王者諸侯所以田獵何為苗除害上以其宗廟下

以簡集士衆春田夏苗秋蒐冬狩四時之田總名為田

云云雖名通義義不通先儒皆依周禮左傳爾雅之文每

年常四時講武三年而一大習

詩采芑疏征伐之時出軍而對陳用治兵禮戰

止至還歸用振旅法名異而禮同也唯公羊以治兵為祠兵

易比九五曰王用三

驅失前禽

馬氏云一乾豆二賓客三君庖

周四時田法

地官鄉師凡四時之田前期出田法于州里簡其鼓鐸
旗物兵器修其卒伍及期以司徒之大旗致衆庶而陳
之以旗物辨鄉邑而治其政令刑禁巡其前後之屯注

田法人徒及所當有前後也車徒異部也

大司馬有司平之注云卿

師居門正其出入之列

春官甸祝掌四時之田表貉之祝號

賈誼新書不抵禽不詭遇逐不出防此苗獮蒐狩之義

也苗者毛取之蒐者搜索之狩者守留之夏不田何也

天地陰陽盛長之時

爾雅春獵為蒐

注搜索取不任者

夏獵

為苗

為苗稼除害

秋獵為獮

順殺氣也

冬獵為狩

得獸取之無所擇

宵田

為獠

管子曰獠獵旱弋

火田為狩

周中冬大閱

振旅陳

虞人表

夏官大司馬中春教振旅司馬以旗致民平列陳如戰

之陳

注凡師出曰治兵入曰振旅皆習戰也四時各教民以其一焉春習振旅兵入收衆專於農平猶正

也辨鼓鐸鐃鐃之用王執路鼓諸侯執賁鼓軍將執晉

鼓師帥執提旅帥執鼙卒長執鐃兩司馬執鐸公司馬

執鐃以教坐作進退疾徐疏數之節

習戰法

遂以蒐田有

司表貉誓民鼓遂圍禁火弊獻禽以祭社

春田為蒐有司大司徒也

立表而貉祭誓以犯田法之罰誓曰無干車無自後射

大弊火止也春田主用火

田止虞人植旌衆皆獻

禽所獲

中夏教芟舍如振旅之陳羣吏撰車徒讀書契辨

號名之用帥以門名縣鄙各以其名家以號名鄉以州

名野以邑名百官各象其事以辨軍之夜事其他皆如

振旅

注戎舍草止也軍有草止之法夜事戒夜守之事草止者慎於夜草舍未有營壘當為夜事之備

遂以苗田如蒐之灋車弊獻禽以享杓

夏田為苗車弊驅獸之車止

也夏田主用車

中秋教治兵如振旅之陳辨旗物之用王載大

常諸侯載旂軍吏載旗師都載旛鄉遂載物郊野載旒

百官載旗各書其事與其號其他皆如振旅遂以獮田

如蒐田之法羅弊致禽以祀枋

秋田為獮獮殺也羅弊罔止也秋田主用罔

中冬教大閱

春辨鼓鐸夏辨號名秋辨旗物至冬大閱簡軍實備軍禮

前期羣吏戒

衆庶修戰灋虞人萊所田之野為表百步則一為三表

又五十步為一表田之日司馬建旗于後表之中羣吏

以旗物鼓鐸鐃各帥其民而致質明弊旗誅後至者

乃陳車徒如戰之陳皆坐

注後表之中五十步表之中央表所以識正行列也四表

積二百五十步左右之廣當容三軍步數未聞疏曰謂從南表至北表東西不言步數

羣吏聽誓

于陳前斬牲以左右徇陳曰不用命者斬之

注陳前南面鄉表也

月令季秋天子教田獵以習五戎司徒摯扑北面以誓之此大閱禮實正歲之中冬而說季秋之政於周為仲

冬為月令者失之矣疏曰皆據夏法用雖建子為正及行事皆用夏之正歲

中軍以鼙令鼓

鼓人皆三鼓司馬振鐸羣吏作旗車徒皆作鼓行鳴鐸

車徒皆行及表乃止三鼓撝鐸羣吏弊旗車徒皆坐

中軍

中軍之將也天子六軍三三而居一偏及表自後表前至第二表也

又三鼓振鐸作旗車

徒皆作鼓進鳴鐸車驟徒趨及表乃止坐作如初

及表自第

二前至第三

乃鼓車馳徒走及表乃止

及表自第三前至前表

鼓戒三

闕車三發徒三刺

戒攻敵三而止象服敵

乃鼓退鳴鐸且卻及表

乃止坐作如初

退自前表至後表習戰之禮出入一也異者廢鐸而鳴鐃

遂以狩田

冬田為狩以旌為左右和之門

軍門曰和

羣吏各帥其車徒以叙

和出左右陳車徒有司平之旗居卒間以分地前後有

也百步有司巡其前後險野人為主易野車為主

注鄉師又

巡其陳既陳乃設驅逆之車有司表貉于陳前

驅驅出禽獸使趨田

逆逆要不得令走設此車者田僕也

中軍以鼙令鼓鼓人皆三鼓羣司馬

振鐸車徒皆作遂鼓行徒銜枚而進大獸公之小禽私

之獲者取左耳及所弊鼓皆駢車徒皆譟徒乃弊致禽

饁獸于郊入獻禽以享烝

徒乃弊徒止也冬田主用衆春之振旅夏之蒐舍枚之

治兵以至鼓鐸錫號名旗物之用皆兼舉並習是為
軍禮之備故曰教大閱必用四表者所以寓王者紀律
之師大武之四表實象之樂記言大武周家寓兵之良
法易氏曰惟中冬大閱合教三時不盡調發皆以人
類逃教稍人注曰凡用役者不必一時皆徧
皆人數調之使勞逸遞焉此遞教之明證 田僕掌馭

田路設驅逆之車令獲者植旌及獻比禽凡田王提馬
而走諸侯晉大夫馳 天官獸人及弊田令禽注于虞

中 置虞人所
立虞旗中

地官山虞大田獵則萊山田之野及弊

田植虞旗于中致禽而珥 澤虞萊澤野弊田植虞旌

以屬禽 春官大宗伯大田之禮簡衆也

因田習兵閱
車徒之數

小宗伯若大甸則帥有司而饁獸于郊遂頒禽肆

師四時之大甸獵祭表貉則為位甸祝掌四時之田表

貉之祝號

田者習兵之禮故亦禡祭

師甸致禽于虞中乃屬禽及郊

饁獸舍奠于祖禰及斂禽

師田謂起大東以田

禡牲禡馬掌其祝

號司服凡甸冠弁服

田獵也

司常及國之大閱贊司

馬頒旗物

注大閱王乘戎路建大常

官府各象其事州里各象其名

家各象其號

注徽識所以題別衆臣樹之於位朝名就馬今大閱禮象而為之左傳昭二十一年

宋厨人濮曰揚徽者公徒也

凡軍事建旌旗及致民置旗弊之甸亦

如之 月令孟冬天子乃命將帥講武習射御角力

注為

仲冬將大閱簡習之凡田之禮
唯狩最備夏小正十一月王狩

周語仲山父曰蒐于

農隙獮於既烝狩於畢時

齊語春以蒐振旅秋以獮治兵

詩車攻注

田者大艾草以為防或舍其中褐纒旃以為門裘纒質

以為櫟間容握驅而入擊則不得入左者之左右者之

右然後焚而射焉天子發然後諸侯發諸侯發然後大

夫士發天子發抗大綏諸侯發抗小綏獻禽於其下故

戰不出項田不出防不逐奔走古之道也 穀梁傳昭

八年秋大蒐于紅正也因蒐狩以習武事禮之大者也
艾蘭以為防置旗以為轅門以葛覆質以為禁流旁握
御輦者不得入車軌塵馬候蹄揜禽旅御者不失其馳
然後射者能中過防弗逐不從奔之道也面傷不獻不
成禽不獻禽雖多天子取三十馬一為乾豆二為賓客
三為充君之庖其餘與士眾習射於澤宮射而中田不
得禽則得禽得禽而射不中則不得禽是知古之貴仁
義而賤勇力也 左傳桓六年大閱簡車馬也 司馬

法天下既平天子大愷春蒐秋獮諸侯春振旅秋治兵所以不忘戰也爾雅出為治兵尚威武也入為振旅

反尊卑也

孫炎曰出則幼賤在前貴勇力也入則尊老在前復常法也公羊傳出曰祠兵入曰振

旅其禮一也

大司徒大田役以旗致萬民治其徒庶

之政令鄉師

見後

小司徒會萬民之卒伍以作田

役小宰聽師田以簡稽掌次師田則張幕設

重帟重案司几筵甸役則役熊席右漆几

注祭表貉所設

席

迹人凡田獵者受令焉巾車木路建大麾以

田

文王田渭陽

六韜文師篇文王齋三日乘田車駕馬田於渭陽見太公載與俱歸史記周西伯將出獵卜之曰所獲非龍非彪非虎非羆所獲霸王之輔於是西伯獵遇太公於渭之陽左傳昭十五年王曰密須之鼓與其大路文所以大蒐也注密須姑姓國文王伐之得其鼓以蒐

詩騶虞文王蒐田以時

選注魯詩傳曰梁騶天子獵之田也

周武王狩

周書世俘第四十武王狩禽虎二十有二貓二麋五千
二百三十五羆十有二麇七百二十有一熊百五十有
一羆一百一十有八豕三百五十有二貉十有八麋十
有六麝五十麋三十鹿三千五百有八

周成王蒐岐陽

左傳昭四年六月丙午楚椒舉曰夏啓有鈞臺之享商
湯有景亳之命周武有孟津之誓成王有岐陽之蒐

周注

成王歸自奄大蒐於岐山之陽岐山在扶風美陽縣西北疏書序云成王歸自奄在宗周諸庶邦作多方云告示四國多方於時諸侯大集故謂岐陽之蒐在此時康有鄴宮之朝穆有塗山之

會齊桓有召陵之師晉文有踐土之盟六王二公之事

皆所以示諸侯禮也諸侯所由用命也定四年衛祝

佗曰成王分康叔云云取於相土之東都以會王之東蒐

書正義左傳言會東蒐王者因會諸侯或亦獵以教戰

晉語叔向曰昔成王

盟諸侯于岐陽楚為荆蠻置茅蕝設望表與鮮牟

東夷

守燎故不與盟

帝王世紀王乃大蒐於岐陽東伐淮夷

韓愈

石鼓歌周綱陵遲四海沸宣王憤起揮天戈大開
明堂受朝賀諸侯劍佩鳴相磨蒐于岐陽騁英俊

萬里禽獸皆遮羅

石鼓文云左騂騂右
駉駉駉駉
秀弓時射

周宣王田獵

詩車攻宣王復古也復會諸侯於東都因田獵而選車
徒疏云因
會而獵田車既好四牡孔阜東有甫草駕言行狩之

子于苗選徒囂囂建旐設旄搏獸于教駕彼四牡四牡
奕奕赤芾金舄會同有繹決拾既飲弓矢既調射夫既

同助我舉柴四黃既駕兩驂不猗不失其馳舍矢如破
蕭蕭馬鳴悠悠旆旌徒御不驚大庖不盈疏東都之界
有廣大之草可就而田獵鄭以甫草為圃田之草圃田
在東都畿內此時宣王為夏田也

夏獵曰田

云行狩者是獵

之總名首章致會同之意二三章致田獵之意四章言
諸侯來會五章言田罷之後射餘獲之禽六七章言田
獵之事歎美之

八章章四句

吉日美宣王田也田車既好

四牡孔阜悉率左右以燕天子發彼小豝殪此大兕以

御賓客且以酌醴

四章章六句

穆天子傳天子獵于鉏山之南西阿獵于滂澤得白狐
玄貉天子西遊射于中闕命虞人掠林有虎在於葭中
天子將至七萃之士高奔戎生捕虎而獻之天子命為
柙畜之東虞是曰虎牢天子筮獵萃澤其卦遇訟逢公
占之賜之駿馬十六絺紵三十篋

晉大蒐 魯蒐狩

左傳僖二十七年晉蒐于被廬作三軍謀元帥

晉常以春蒐禮

改政令教其始也

晉侯教其民大蒐以示之禮

順少長明貴賤

文六

年蒐于夷舍二軍改蒐于董易中軍襄十三年蒐于

緜上治兵使士勾將中軍

注比年簡徒謂之蒐三年簡車謂之大閱五年大簡車徒

謂之大蒐

穀梁疏書狩有四桓四年郎莊四年部僖二十八年河陽哀十四年西獲麟言蒐有五昭八年紅十一年比蒲二十二年昌間定十三年比蒲十四年比蒲

漢都試

通典漢設南北軍命天下選能引強覺張材力武猛者

以為輕車騎士材官樓船立秋後肄孫吳兵法六十四

陣每十月都課試金革騎士各有員數

漢承秦制十月幸長安水南門

會五營士為八陣進退

高紀十一年注材官騎士習射御騎馳

戰陣常以八月太守都尉令長丞會都試課殿最水處

則習樓船邊郡將萬騎行障塞光武時省

光武見翟義反隗囂叛皆

以秋試勒車騎誅守長以起

燕王旦傳將軍都郎羽

林注張晏曰都試也師古曰謂大會試之漢光祿挈令

諸當試者不會都所免之

燕王旦云非教士不得從

韓延壽傳守

東都及都試講武設斧鉞旌旗習射御之事試騎士

又傳

云坐射室注曰都試射堂也

王莽傳大司馬董忠方講兵都肄

李通傳光武相約結期以材官都試騎士日刼前隊大

夫及屬正

注漢法以立秋日都試騎士謂課殿最也東郡太守翟義誅王莽以九月都試日勒車

騎材官士是也

耿弇傳常見郡尉試騎士建旗鼓肄馳射由

是好將帥之事

續志建武六年省諸郡都尉并職太

守無都試之役

古今注曰六年八月省都尉官

應劭漢官曰自郡國罷

材官騎士之後官無警備實啓寇心 魏有司奏漢惟
十月都講唐人杜佑謂立秋肄孫吳十月課都試而漢
官儀以謂在八月翟義傳以九月都試 都試不詣試
所者必免都試僭上者必誅

漢講武場

史記正義

功臣表

括地志云故平縣城在洛州偃師縣西

北二十五里有漢祖講武場 水經注平縣有高祖講

武場

哀紀贊時覽卞射武戲

甘延壽傳試卞為期門

蘇林曰手

搏為卞角

力為武戲

漢勞軍細柳

文帝紀後六年冬匈奴三萬騎入上郡三萬騎入雲中

烽火通於

甘泉長安以中大夫令免為車騎將軍屯飛狐故楚相

蘇意為將軍屯句注將軍張武屯北地河內太守周亞

夫為將軍次細柳注服虔曰在長安西北如淳曰長安

細柳倉在渭北近石澂張揖曰在昆明池南今有柳市

是也師古曰匈奴傳云置三將軍軍長安西細柳渭北

棘門灞上此則細柳不在渭北明矣當如揖說在昆明

池之南者也

史記索隱曰按三輔故事細柳在直城門外阿房宮西北揚雄書云發三將軍屯

細柳霸上以備之數月乃罷

周亞夫傳宗正劉禮為將軍次霸上

祝茲侯徐厲為將軍次棘門亞夫為將軍次細柳以備

胡上自勞軍至霸上棘門軍直馳入已而之細柳軍天

子先驅至不得入軍門都尉曰聞將軍令不聞天子詔

居無何上至不得入上使使持節詔將軍曰吾欲勞軍

亞夫傳言開壁門壁門士請車騎曰軍中不得驅馳上
乃按轡徐行至中營亞夫揖曰介冑之士不拜請以軍
禮見天子為改容式車使人稱謝皇帝敬勞將軍成禮
而去上曰嗟乎此真將軍矣曩者霸上棘門若兒戲耳
其將可襲而虜也至於亞夫可得而犯耶稱善久之郡續

國志長安有細柳聚前書周亞夫所屯處元和志細柳營在萬年縣東北三十里相傳云周亞夫屯軍處今按亞夫所屯在咸陽縣西南二十里言在此非也細柳原在長安縣西南三十三里別是一細柳非亞夫屯軍之所細柳倉在咸陽縣西南二十里漢舊倉也亞夫軍次細柳即此是也張揖云在昆明池南恐為疎遠

馮韜漢文帝幸細柳營賦戈鋌有耀壓灞水之波瀾

士馬無聲悄轅門之風日上林賦掩細柳

細柳觀在昆明池南

紀文帝十四年冬匈奴寇邊遣三將軍軍隴西北地上
郡中尉周舍為衛將軍郎中令張武為車騎將軍軍渭
北車千乘騎卒十萬人上親勞軍勒兵申教令賜吏卒
自欲征匈奴後漢耿弇傳建武五年車駕至臨淄自
勞羣臣大會

漢上林校獵 講習戰陳 校獵廣成

司馬相如傳請為天子游獵之賦相如欲明天子之義

以推天子諸侯之苑囿其辭曰天子之上林云云背秋涉

冬天子校獵

師古曰以木相貫穿總為闌枝遮止禽獸而獵取之

乘鏤象六玉蚪

拖蜺旌靡雲旗前皮軒後道游孫叔奉轡衛公參乘扈

從橫行出乎四校之中

闌校之四面也

鼓嚴簿縱獵者江河為

陸太山為櫓

陸獵者圍陳遮禽獸也櫓望樓也

車騎雷起殷天動地手

熊羆足蹙羊蒙鶡蘇絳白虎追怪物出宇宙鬱蕃弱滿

白羽射游臬櫟蜚遽擇肉而後發先中而命處回車而

還覽石闕歷封巒過鵙鵲望露寒下堂黎息宜春西馳
宣曲濯鷁牛首登龍臺掩細柳它它藉藉掩平彌澤於
是置酒顯天之臺張樂膠葛之寓解酒罷獵命有司曰
地可墾闢悉為農郊以贍氓隸射貍首兼騶虞弋玄鶴
舞千戚載雲罕掩羣雅四海之內靡不受獲 匈奴傳

贊文帝中年赫然發憤遂躬戎服親御鞍馬從六郡良
家材力之士馳射上林講習戰陳聚天下精兵軍於廣
武顧問馮唐與論將帥喟然嘆息思古名臣

六郡隴西
天水安定

北地上郡西河也其安定天水西河武帝所置史追言之

韓嫣傳江都王入朝從

上獵上林中天子車駕趨通未行先使嫣乘副車從數

十百騎馳視獸 史記平準書武帝北出蕭關從數萬

騎獵新秦中以勒邊兵 揚雄傳成帝時十二月羽獵

雄從以為羽獵甲車戎馬器械儲侍禁禦所營尚泰奢

麗誇詡非堯舜成湯文王三驅之意也故因校獵賦以

風

文選云羽獵賦七畧曰羽獵永始三年十二月上

曰玄冬季月帝將田于靈

之囿乃詔虞人典澤東延昆鄰西馳闔闔爾乃虎路落

三峽以為司馬圍經百里而為殿門營合圍會然後先
置庠白楊之南昆明靈沼之東賁育之倫蒙盾負羽杖
鎧邪而羅者以萬計其餘荷垂天之畢張竟野之罟靡
日月之朱竿曳彗星之飛旗於是天子乃以陽鼂始出
庠玄宮撞鴻鐘建九旒六白虎載靈輿蚩尤並轂蒙公
先驅立歷天之旂曳捎星之旃辟歷列缺吐火施鞭入
西園切神光望平樂徑竹林蹂蕙圃踐蘭唐舉烽烈火
轡者施披方馳千駟校騎萬師虓虎之陳從橫膠轕天

動地爰於是天清日晏逢蒙列皆羿氏控弦望舒彌轡
翼乎徐至於上蘭壁壘天旋神扶電擊罕車飛揚武騎
聿皇進退履獲丘累陵聚禽殫中衰相與集靖冥之館
以臨琬池文身之技水格鱗蟲仁聲惠於北狄武義動
於南鄰發黃龍之穴窺鳳凰之巢臨麒麟之囿幸神雀
之林奢雲夢侈孟諸非章華是靈臺創道德之囿弘仁
惠之虞馳弋乎神明之囿醇洪庖之德豐茂世之規
西都賦盛娛遊之壯觀奮大武於上囿因以威戎夸狄

曜威靈講武事命荊州使起鳥詔梁野而驅獸毛羣飛
羽集禁林而叱聚水衡虞人理其營表罟罔連絃籠山
絡野列卒周匝星羅雲布乘鑿輿備法駕六師發逐百
獸駭殫收禽會衆論功賜胙陳輕騎以行魚騰酒車以
斟酌西京賦振天維衍地絡鳥畢駭獸咸作虞人掌
馬為之營域焚萊平場槎木剪棘結置百里遠杜蹊塞
迺卒清候武士赫怒緹衣韎韐睢眦跋扈置互擺牲割
鮮野饗東平王蒼傳永平四年春車駕近出觀覽城

第尋聞當遂校獵河內蒼上書諫曰惟陛下因行田野

循視稼穡至秋冬乃振威靈整法駕備周衛設羽旄帝

即還宮 紀明帝永平十五年冬車騎校獵上林苑

周禮

校人掌王田獵之馬故曰校獵

安帝延光二年十一月甲辰校獵上

林苑 順帝永和四年冬十月戊午校獵上林苑歷函

谷關而還 桓帝永興二年冬十一月甲辰校獵上林

苑遂至函谷關延熹元年十月校獵廣成遂幸上林苑

六年十月丙辰

同上 是歲陳蕃諫曰臯陶戒舜無放逸遊周公戒成王無盤遊田詳見苑圖

靈帝光和五年十月校獵上林苑歷函谷關遂狩于
廣成苑 東都賦順時節而蒐狩簡車徒以講武歷騶
虞覽駟驥嘉車攻采吉日集于中囿陳師按叱樂不極
盤殺不盡物 張衡羽獵賦山靈護陳方神蹕御輕車
颺厲羽騎電驚馬蹂躪鹿輪轉雉兔 車軌塵馬候蹄
既戒其馳騁不合圍不殫物又禁其暴殄命肆師以表
貉俾田僕而馭路 文帝馳車袁公止轡孝武好田相
如獻規

漢長楊大獵

紀文帝永光五年冬辛長楊射熊館布車騎大獵

薛廣德傳

元帝辛甘泉郊泰畤禮畢因留射獵廣德上書上即日還

成帝元延二年冬行幸

長楊宮從胡客大校獵宿萑陽宮揚雄傳上將大誇

胡人以多禽獸秋命右扶風發民入南山西自褒斜東

至弘農南畝漢中張羅罔罾罾捕熊羆豪猪虎豹玃獾

狐兔麋鹿輸長楊射熊館以罔為周陸縱禽獸其中令

胡人手搏之自取其獲上親臨觀雄上長楊賦以諷曰

時以有年出兵整輿竦戎振師五柞習馬長楊簡力狡
獸校武票禽乃萃然登南山瞰烏弋西厭月蝟東震日
域車不安輶日未靡旃從者彷彿翫屬而還亦所以奉
太宗之烈遵文武之度復三王之田反五帝之虞司
馬相如傳為郎嘗從上至長楊獵丹府元龜武帝建天
元三年南獵長楊天
子好自擊熊豕馳逐羣獸相如上疏諫是胡越起於轂
下而羌夷接軫也清道而後行中路而馳猶時有銜檠
之變況涉豐草騁丘虛前有利獸之樂內無存變之意

上善之

長楊宮
在盤屋

漢軻劉乘之 軻臚

禮儀志立秋之日迎氣禮畢始揚威武斬牲於郊東門以薦陵廟其儀乘輿御戎路白馬朱鬣執弩射牲牲以鹿麋太宰令謁者各一人載獲車馳駟送陵廟還宮遣使齎束帛以賜武官武官肄兵習戰陣之儀斬牲之禮名曰軻劉兵官皆肄孫吳兵法六十四陣名曰乘之軻劉之禮祠先虞

詳見祠壇類

執事告先虞以烹鮮時有司乃

逡巡射牲獲車畢有司告事畢

古今注曰永平元年六月乙卯初令百官驅臘

風俗通稱韓子書山居谷汲者臘臘而寘水又曰嘗新始殺食曰驅臘

武帝紀太初二

年三月行幸河東祠后土令天下大酺五日臘五日祠

門戶比獵注伏儼曰臘音劉殺也蘇林曰臘祭名也驅

虎屬常以立秋祭獸王者亦以此日出獵還以祭宗廟

故有驅臘之祭師古曰獵者冬至後祭百神也如淳曰

漢儀注立秋驅臘師古曰續漢書作驅劉臘劉義各通

陳蕃傳延熹六年車駕幸廣成校獵上疏諫曰人君

有事於苑圃惟仲秋西郊順時講武殺禽助祭以厚教
敬 輿服志注漢舊儀曰秋貆劉服細幘 魏書建安

二十一年三月有司奏古者四時講武於農隙漢取秦
制三時不講唯十月都試車駕幸長安水南門會五營
士為八陣進退名曰乘之今兵甲未偃士民素習可無

四時講武但以立秋擇吉日大朝車騎號曰治兵上合

禮名下承漢制

又漢禮志注又晉志

是冬治兵

文選注云二十二年十月甲午治兵

魏王親執金鼓以令進退

晉志漢貆劉既還公卿以下陳雉陽前

街乘輿到天子下車古語曰在車下車惟此時施行

周禮注

射人祭祀則贊牲注

今立秋有軀劉疏漢時苑中有軀劉

鹽鐵論月令涼風至殺氣動蜻蛚鳴衣裘成天子行
微刑始軀腰以順天令 後魏永興五年以九月十月
之交親行軀劉之禮

漢大閱西園

文選東京賦文德既昭武節是宣三農之隙耀威中原

歲惟仲冬大閱西園

注上林苑也 中平五年
八月初置西園八校尉

虞人掌

馬先期戒事悉率百禽鳩諸靈囿獸之所同是謂告備
乃御小戎撫輕軒中畋四牡既佶且閑戈矛若林牙旗
繽紛迄于上林結徒為營叙和樹表司鐸授鉦坐作進
退節以軍聲三令五申示戮斬牲陳師鞠旅教達禁成
火烈具舉武士星敷鵝鵠魚麗箕張翼舒軌塵掩迤匪
疾匪徐馭不詭遇射不剪毛升獻六禽時膳四膏馬足
未極輿徒不勞成禮三驅解罟放麟不窮樂以訓儉不
殫物以昭仁慕天乙之弛罟因教祝以懷民儀姬伯之

渭陽失熊羆而獲人澤浸昆蟲威振八寓好樂無荒允
文允武薄狩于教既瑣瑣焉岐陽之蒐又何足數 古
文苑張衡羽獵賦鳳凰獻歷太僕駕具蚩尤先驅雨師
清路山靈護陳方神蹕御羲和奉轡弭節西征翠蓋威
蕤鸞鳴玲瓏抗天津於伊洛賔遙集乎南圃大詔獠者
競逐長驅輕車飈厲羽騎電驚馬蹂康鹿輪鞞狐兔
王符羽獵賦曰天子乘碧瑤之雕軫建曜天之華旗

漢講武平樂觀

靈帝紀

何進傳

中平五年十月甲子詔大發四方兵講武

于平樂觀下起大壇建十二重五采華蓋高十丈東北
為小壇復建九重華蓋高九丈引步兵武士數萬人結
營為陳天子親出臨軍駐大華蓋下何進駐小華蓋下
禮畢帝躬擐甲介馬自稱無上將軍行陳三匝而還詔
進領兵屯觀下

六韜有天
子將兵事

史記平準書武帝北出蕭

關從數萬騎獵新秦中以勒邊兵

魏閱兵東郊

晉禮志魏延康元年六月辛亥立秋閱兵東郊公卿相

儀王御華蓋親令執金鼓之節

文帝為
魏王

魏志明帝大

和元年十月丙寅閱兵

一云治兵
於東郊

魏都賦大閱以義

舉備法駕理秋御顯文武之壯觀邁梁騶之所著

魏校獵

魏志文帝黃初二年正月甲戌校獵至原陵四年八月

辛未校獵于滎陽 文帝有校獵賦 應瑒校獵賦曰

二虞萊野二扈表禽

晉宣武觀大閱 鴈羽仗

紀武帝泰始九年十一月丁酉臨宣武觀大閱諸軍甲辰乃罷十年十一月庚午帝臨宣武觀大閱諸軍咸寧元年十一月癸亥大閱於宣武觀至于己巳三年十一月丙戌帝臨宣武觀大閱至於壬辰太康四年十二月庚午大閱於宣武觀六年十二月甲申大閱於宣武觀旬日而罷 禮志武帝泰始四年九月咸寧元年太康四年六年冬皆自臨宣武觀大閱衆軍然不自令進退

也元帝太興四年詔左右衛及諸營教習依大習儀作
雁羽仗成帝咸和中詔內外諸軍戲兵於南郊之場故
其地因名鬪場 山濤傳吳平之後帝詔天下罷軍役
州郡悉去兵大郡置武吏百人小郡五十人帝嘗講武
于宣武場濤乘步輦從因諭用兵之本以為不宜去州
郡武備其論甚精于時咸以濤不學孫吳而暗與之合
帝曰天下名言也而不用 王戎傳年六七歲於宣武
場觀戲猛獸戎立不動魏明帝於閣上見而奇之 秦

獻王東傳武帝嘗幸宣武場以三十六軍兵簿令東科校之水經注南望天淵池北矚宣武場

晉南郊大閱

成帝紀咸和元年十一月壬子大閱於南郊

自後諸方伯閱習

宋大蒐宣武場 講武宣武堂 立武館閱武

宋書文帝元嘉五年正月甲申立武館閱武十六年正月戊寅北郊閱武二十五年閏二月己酉大蒐於宣武場三月庚辰校獵文帝肄習衆軍兼用漢魏之禮其後

以時講武於宣武堂孝武孝建二年九月丁亥於宣武
場閱武 宋儀領軍督右甄護軍督左甄大司馬居中
齊永明四年正月戊午幸宣武堂講武六年九月壬寅
於瑯琊城講武習水步軍九年九月戊辰又幸 梁大
同四年九月閱武樂遊苑 陳天嘉元年八月幸正陽
堂閱武

唐講武都外 五陣

禮志仲冬之月講武于都外前期十一日所司奏請講

武兵部承詔遂命將帥簡軍士除地為場方一千二百步四出為和門又為步騎六軍營域左右廂各三軍立五表表間五十步為三軍進止之節前一日講武將帥及士卒集於壇所建旗為和門如方色都壇之中及四角建五采牙旗大將被甲乘馬教習士衆講武之日步軍為直陣以俟大將立旗鼓之下鼓三嚴諸衛各督其隊與鈚戟入陳於殿庭皇帝乘革輅至壇所兵部尚書介冑乘馬奉引入大次謁者引諸州使人鴻臚引蕃客

立大次東西及北觀者立於都墀騎士仗外四周然後
講武吹大角三通中將軍各以輦令鼓三鼓有司偃旗
步士皆跪長史振鐸分循諸果毅各以大將誓詞告於
其部遂聲鼓有司舉旗士衆皆起行及表擊鉦乃止為
東西軍乃舉青白赤黑黃旗為方圓曲直銳陣凡陣先
舉者為客後舉者為主每變陣各選五十人挑戰迭為
勇怯之狀敵均之勢勝敗之形騎馳徒走左右軍俱至
中表相擬擊而還二軍騎軍皆如步軍之法每陣各八

騎挑戰五陣畢大擊鼓而前盤馬相擬擊而罷遂振旅
侍中跪奏禮畢乃還

唐狩田禮

禮志狩田之禮亦以仲冬前期十日兵部集衆庶修田
法虞部表所田之野建旗於其後前一日諸將帥士集
於旗下質明弊旗後至者罰兵部申田令遂圍田其兩
翼之將皆建旗至田所皇帝鼓行入圍鼓吹令以鼓六
十陳於皇帝東南西南向六十陳於西南東向皆乘馬各

備簫角乃設驅逆之騎皇帝乘馬南向有司斂大綏以從諸王公以下皆乘馬帶弓矢陳於前後所司之屬又斂小綏以從乃驅獸出三驅過皇帝乃從禽左而射之皇帝發抗大綏然後公王發抗小綏驅逆之騎止然後百姓獵田將止虞部建旗於田內乃雷擊駕鼓及諸將之鼓士從譟呼諸得禽獸旗下致其左耳乃命有司饁獸於四郊告至於廟

唐講武同官 武德大閱

高祖紀武德元年十月辛丑大閱八年十一月十日庚子講武于同官 會要元年十月四日詔殺氣方嚴宜順天時耀威武可大集諸軍朕將臨校閱八年十月二十日校獵周氏陂褚亮上疏諫十一月十日講武於同官縣 陳校獵莫府山虞世基講武賦曰上林從幸相如頌德長楊校獵子雲為賦選羽林於七郡詔蹶張於五營命司馬以示法帥掌固而清甸導甸始以前驅伏鈎陳而後殿抗烏旌於驍雄

步軍為雄武並
隸侍衛親軍

通典武

德五年十二月九日丙辰幸涇陽之華池校獵謂羣臣曰今日畋樂乎蘇世長進曰不滿十旬未為樂也

唐高祖獵渭濱

高祖紀武德二年十二月丙申獵于華山

通鑑十二月庚申三

年正月己巳獵于渭濱四年閏月壬戌獵于好畤乙丑

九夔丁卯仲山戊辰清水五年十一月癸卯獵于富平

北原十二月丙辰獵于萬壽原六年二月壬子獵于驪

山十月庚申獵于白鹿原十二月辛卯獵于沙苑丁酉

獵于伏龍原七年十月辛未獵于鄆南

校獵于鄆之南山

庚寅

獵于圍川戊辰獵于高陵八年四月甲申如鄆獵于甘

谷十月辛巳如周氏陂獵于北原十一月辛卯如宜州

獵于西原癸丑獵于華池北原十二月庚辰獵于鳴犢

泉

辛巳還宮

舊紀武德五年十一月丙申幸宜州簡閱將

士十二月丙辰校獵于華池

白鹿見帝射獲之

六年二月辛亥

一作戊午

校獵於驪山

獲白鹿

十一月校獵於沙苑丁亥校獵

於華陰七年十一月

一云十月

戊辰校獵於高陵八年十

月辛巳幸周氏陂校獵 實錄武德元年十二月乙酉
幸周氏陂過故莊丙戌校獵置酒高會二年十二月狩
於華山三年正月校獵渭汭十二月甲辰校獵渭北四
年閏十月壬戌校獵好畤乙丑校獵九畷丁卯校獵仲
山戊辰校獵清水谷十二月丙辰校獵杜陵原五年十
二月癸卯校獵富平北原六年十月己未幸華陰庚申
校獵白鹿原八年十一月辛卯幸宜州校獵西原癸未
校獵華池之北原

唐狩鳴犢野 冬狩詩

會要武德八年十二月詔侍臣曰獵以告宗廟朕當躬

其事以申孝享之誠於是狩于鳴犢之野

甲午

宴從官貞

觀十六年十二月二十三日

甲辰

狩驪山時陰寒晦冥圍

兵斷絕上欲舍其罰恐虧軍令迴轡入谷以避之龍朔

元年十月五日狩于陸渾高宗親御弧矢獲鹿兔上製

冬狩詩咸亨二年十二月幸許州癸酉陳冬狩之禮因

校獵昆水之陽

唐太宗獵魚龍川 獵伊闕 獻獲大安宮

大蒐廣成澤 獵岐陽

太宗紀貞觀四年十月辛丑獵于貴泉谷甲辰獵于魚
龍川獻獲于大安宮十二月甲辰獵于鹿苑五年正月
癸酉獵于昆明池丙子獻獲于大安宮十二月癸卯獵
于驪山七年十二月甲寅幸芙蓉園丙辰獵于少陵原
一云校獵八年十二月丁卯從太上皇閱武于城西 十一年二月壬午獵于鹿臺
嶺三月辛亥獵于廣成澤 舊紀云大蒐於廣成澤 十一月乙未獵

狩濟源麥山十二年二月乙亥獵于河濱

一云苑

十月已

卯獵于始平

一云改

十三年十二月壬辰獵于咸陽

一云狩

十四年閏十月乙未如同州甲辰獵于堯山十二月已

卯獵于樊川

一云校獵

十五年十月辛卯獵于伊闕

一本云大閱一

云校獵

壬辰如洛陽宮十六年十一月丙辰獵于武功壬

戌獵于岐山之陽十二月甲辰獵于驪山十八年十月

已巳獵于天池

澠池縣

十九年二月癸丑射虎于武德北

山二十二年二月已卯獵于華原 實錄十一年十一

月乙未狩于濟源之陵山親御弓矢以所獲鹿薦廟十月獵于洛陽苑唐儉諫罷獵十六年十二月壬辰畋于咸陽太宗出獵詩三驅陳銳卒七萃列材雄瑯戈夏服箭羽騎綠沈弓冬狩詩心非洛汭逸意在渭濱遊

唐顯德殿習射

見射類

唐大蒐昆明池校獵武功岐陽

會要貞觀五年正月十三日癸酉大蒐於昆明池夷落

君長從

甲戌宴羣臣

政要秘書監虞世南諫獵曰摧斑碎

掌親御皮軒舉旗効獲式遵前古然馬卿直諫於前張
昭變色於後天弘星畢所殪者多頒獸賜獲皇恩亦溥
願息獵車韜長戟袒楊徒搏任之羣下 貞觀十四年

幸同州沙苑親格猛獸晨出夜還魏徵諫十月將幸櫟
陽遊獵縣丞劉仁軌上表切諫乃罷獵 通鑑貞觀十

六年十一月丙辰上校獵武功壬戌校獵岐陽因幸慶

善宮召武功故老宴賜庚午還京師

唐閱武城西

紀貞觀八年十二月丁卯從太上皇閱武于城西 會
要貞觀八年十二月二十九日乙卯皇帝從太上皇閱
武於城西高祖親視勞將士而還置酒未央宮 通鑑
七年十二月戊午帝幸芙蓉園校獵少陵原從上皇置
酒故漢未央宮命頡利起舞又遣南蠻酋長馮智戴賦
詩既而嘆曰胡越一家自古未有帝奉觴上壽

唐高宗獵滎南 滎水講武 尚書臺觀講武

講武臺 講武新鄭 講武城西并州

高宗紀顯慶二年十一月戊戌如許州乙巳獵于滎南

壬子講武于新鄭赦鄭州免一歲租賦五年正月甲子

如并州三月己酉講武于城西十一月甲寅如許州十

二月辛未獵于安樂川一云校獵龍朔元年十月丁卯獵于

陸渾一云狩戊辰獵于非山一云校獵一云辛未狩于南山總章二年九

月壬寅如岐州實錄云大蒐於岐山咸亨二年十二月癸酉獵于

昆陽三年四月壬申校獵于洛水之陰上元元年十一

月丙午

一作朔

如東都已酉獵于華山曲武原

一作

會

要顯慶二年十一月二十一日講武澧水之南行三驅

禮設次於尚書臺以觀之

志在許州臨潁縣

許州長史封道弘

奏臺本漢南郡太守馬融講尚書於此因以為名今陞

下親降此臺以觀教習請改為講武臺從之五年三月

二十八日巳酉講武并州城北

紀云城西

上御飛閣左衛將

軍張延師為左軍領左右驍武六衛左羽林騎士屬焉

右武侯將軍梁建方為右軍領左右威衛六衛右羽林
騎士屬焉一鼓而誓衆再鼓而整列三鼓而交前左為
曲直圓銳之陣右為方銳直圓之陣三挑而五變步退
而騎進五合而各復其位許敬宗奏曰延師整而堅建
方敢而銳皆良將也 志太原府晉陽縣西北五十里
有講武臺飛閣顯慶五年築

唐講武邙山 翔鸞閣觀大閱 含元殿大閱

紀又實錄

高宗麟德二年四月丙寅

二十
五日

講武邙山之陽

御北城樓觀之

肅宗至德二載八月癸巳大閱

御鳳翔府門

三載

正月庚寅

乾元元年時未改元

大閱諸軍於含元殿上御翔鸞閣

觀之

會要云御翔鸞閣習武

代宗寶應元年九月壬寅大閱明

鳳門街

武宗會昌二年七月辛酉左神策軍閱武大中

五年五月敕諸道擇明兵法能弓馬鎗弩筒射軍將二

人為教練使分番閱試

唐講武驪山

紀太宗貞觀五年十二月癸卯校獵驪山十六年十二

月甲辰狩驪山睿宗先天元年十月辛卯獵于驪山

玄宗開元元年十月己亥幸溫泉一云湯癸卯講武于驪

山免新豐來歲稅賜從官帛會要先天二年十月十

三日

元龜云
癸亥

講武于驪山之下發兵二十萬旌旗亘五

十餘里戈鋌金甲照耀天地列大陣於長川坐作進退

以金鼓之聲節之三軍出入號令如一親擐戎服持沈

香大鎗立於陣前流兵部尚書郭元振斬禮儀使唐紹

虧失軍容故也衆以帥及禮官得罪諸部頗失叙唯薛

訥及解琬軍不動上令輕騎召之至軍門不得入禮畢

特加慰勞

闕

開元元年十月癸卯講武于驪山

既三令帝親鼓之朔方大總管代國公郭元振遽奏禮畢帝怒軍令不整將斬之劉幽求張說跪於前諫曰元振有大功於社稷不可殺乃流新州斬典儀唐紹于蘇

下甲辰獵于渭川

一本云二年十月甲辰畋渭川三年十月制曰周有岐陽之蒐漢有扶風

之命問者因孟冬臨右輔戒五校備三驅其散圍兵各賜綿布

其禮除地為壇千二百

步四出為和門為步騎六軍營域立五表皇帝革路入

大次然後講武步騎各出陣遂振旅又建五采牙旗長者執弓矢短者執矛戟力者執旌勇者執金鼓刀楯為前行持稍次之弓箭為後旗卧則跪旗舉則起未明十刻而嚴五刻而甲步軍為直陣以俟大將立旗鼓之下二刻三嚴諸衛各督其隊與鈇戟以次入陳於殿庭旗具五方之色陳有方員曲直銳其挑戰或迭為勇怯之狀或為均敵之勢或為勝負之形騎軍盤馬相擬擊而罷遂振旅侍中跪奏畢而罷

已見禮樂志

會要開元八年

八月詔曰五材並用誰能去兵四方雖安不可忘戰故周禮以軍禁糾邦國以蒐狩習戎旅不教人戰是謂棄之宜遣使於兩京諸州教練辨其旗物簡其車徒習攻取進退之方陳威儀貴賤之等俾少長有禮疾徐有節姚崇傳徙同州刺史先天二年玄宗講武新豐故事天子行幸郡守在三百里者得詣行在時帝亦密召崇崇至帝方獵渭濱即召見帝曰公知獵乎對曰居廣成澤以呼鷹逐獸為樂少為獵師老而知能帝悅與俱馳

逐緩急如旨

唐獵渭川

魏知古傳先天元年為侍中從獵渭川獻詩以諷

呂向傳天

子數校獵渭川
向獻詩規諷

會要先天元年十月七日

紀辛卯

幸新

豐獵于驪山之下十一月三日侍中魏知古上詩諫

十韻

子雲陳羽獵傳伯諫漁棠得失監齊楚仁思念禹湯手

制曰時因暇景掩渭而畋開一面之羅展三驅之禮賜

物五十段開元十七年十二月乙丑校獵渭濱

唐校獵太原

會要開元三年十月二十四日大蒐於鳳泉湯

紀甲子如鳳泉

湯二十年冬校獵太原

紀十一月辛丑如北都

玄宗紀開元八

年十月辛巳如長春宮壬午獵于下邳

華州

十年十月甲

寅如興泰宮獵于上宜州十四年十月巳巳如東都十

二月丁巳獵于方秀川

幸壽安

十五年十一月丁卯獵于

城南校獵義成逢大雪題九詠示羣臣李白大獵

賦序孟冬十月大獵于秦

唐畋禁苑

實錄代宗大曆七年十月壬子畋于禁苑一發連二兔
示宰臣仍賜之癸丑上言漢武有獲蛟之歌魏祖有南

皮之事開元中蒐岐陽有百中之捷請付史官

紀大曆四年十

一月辛未禁
畿內弋獵

德宗貞元八年十二月甲辰畋城東

畋紀

作獵
下同

十一年十二月戊辰畋苑中幸左神策勞軍 憲

宗元和九年十一月戊子

一云
丙子

罷京兆府獵獻狐兔

穆宗元和十五年十二月庚辰畋城南長慶二年十月

已卯狩咸陽十一月癸酉幸華清宮狩于驪山

狩紀作獵

武宗開成五年十一月癸酉朔幸雲陽校獵會昌元年

十月幸咸陽校獵二年十月校獵太白原十一月獵白

鹿原四年十二月獵雲陽

紀十月獵于鄠縣

六年十二月幸涇

陽校獵白鹿原宣宗大中八年九月獵于苑北問樵

夫以涇陽令李行言之政袖中之鵠恥魏徵之見苑

中之遊畏韓休之聞

玉海卷一百四十四